

四庫全書

子部

欽定四庫全書

子部
圖書編卷十二

詳校官中書臣孫衡

主事臣祁韻士覆勘

總校官進士臣朱鈐

校對官中書臣康儀鈞

謄錄監生臣蔡本崇

欽定四庫全書

圖書編卷十二

明 章潢 撰

學春秋叙

名分在天地間正則世治紊則世亂春秋成而亂賊
懼義在正名分也傳春秋者乃以亂天下名分加諸
仲尼而咸莫之覺於心忍乎哉若曰仲尼欲行夏時
故以夏時冠周月又曰仲尼以天自處故黜天王貶

斥當時諸侯卿大夫以其權與魯是為亂賊之尤矣
且魯史未經聖筆已前其篇章不知幾何仲尼於每
歲特筆其有關名分者數條云耳餘則削之使其辭
相屬事相比一展卷而大義了然非故簡奧辭旨俾
人莫之測識然後知所懼也諸家或覈其事或精其
義或定為正例變例以表章之未必無小補特于從
周不倍之仲尼使之冒大不諱之名於心有不安也
故敢冒罪竊義以暴白之云

春秋二十王圖

平王	桓王	莊王	僖王	惠王	襄王	頃王	匡王	定王	簡王	靈王	景王
----	----	----	----	----	----	----	----	----	----	----	----

春秋魯二十公圖

隱公

桓公

莊公

閔公

僖公

文公

宣公

成公

襄公

昭公

定公

哀公

孔子曰吾志在春秋

孟子曰孔子懼作春秋春秋天子之事也是故孔子曰知我者其惟春秋乎罪我者其惟春秋乎

孔子成春秋而亂臣賊子懼

孟子曰王者之迹熄而詩亡詩亡然後春秋作晉之棄楚之禱杙魯之春秋一也其事則齊桓晉文其文則史孔子曰其義則丘竊取之矣

孟子曰春秋無義戰彼善於此則有之矣征者上伐

下也敵國不相征也

左傳君子曰春秋之稱微而顯志而晦婉而成章盡而不汙懲惡而勸善非聖人誰能修之

穀梁傳曰成天下之事業定天下之邪正莫善于春秋

司馬遷曰春秋文成數萬其旨數千萬物之散聚皆在春秋春秋之中弑君三十六亡國五十二諸侯奔走不得保社稷者不可勝數察其所以皆失其本矣故

易曰差以毫釐謬以千里故臣弑君子弑父非一朝
一夕之故其漸久矣有國者不可以不知春秋前有
讒而不見後有賊而不知為人臣者不可以不知春
秋守經事而不知其宜遭變事而不知其權為人君
父而不通于春秋之義必蒙首惡之名為人臣子而
不通於春秋之義必陷篡逆誅死之罪故春秋者禮
義之大宗也王通曰春秋之于王道是輕重之權衡
曲直之繩墨也舍則無所折衷矣又曰春秋其以天

道終乎故止于獲麟

韓愈曰春秋謹嚴又曰孔子之作春秋諸侯用夷禮則夷之進于中國則中國之

周子曰春秋正王道明大法也孔子為後世王者而修也亂臣賊子誅死者于前所以懼生者于後也宜乎萬世無窮王祀夫子報德報功之無盡焉

程頤曰五經載道之文春秋聖人之用五經之有春秋猶法律之有斷例也又曰五經如藥方春秋如用

藥如治病聖人之用全在此書又曰春秋傳為案經為
斷又曰以傳考經之事迹以經別傳之真偽又序曰
孔子作春秋為百王不易之大法後世以史視春秋
謂褒善貶惡而已至于經世之大法則不知也春秋
大義數十炳如日星乃易見也惟其微辭與義時措
從宜者為難知耳或抑或縱或予或奪或進或退或
微或顯而得乎義理之安文質之中寬猛之宜是非
之公乃制事之權衡揆道之模範也夫觀百物而後

識化工之神聚眾財而後知作室之用于一事一義而欲窺聖人之用非上智不能也故學春秋者必優游涵泳默識心通然後能造其微也

邵雍曰春秋皆因事而褒貶非有意於其間故曰春秋盡性之書也又曰春秋為君弱臣強而作故謂之名分之書又曰聖人之經渾然無跡如天道焉春秋錄其事而善惡形乎其中矣又曰春秋孔子之刑書也

胡宏曰天理人欲莫明辨於春秋聖人教人消人慾
復天理莫深於春秋

胡安國曰春秋為誅亂臣賊子而作其法尤嚴於亂
賊之黨又曰通于春秋然後能權天下之事又曰春
秋之文有事同則辭同若後人因謂之例然有事同
而辭異則其例變矣是故正例非聖人莫能立變例
非聖人莫能裁正例天地之常經變例古今之通誼
惟窮理精義於例中見法法外通例者斯得之深矣

又序曰古者列國各有史官掌記時事春秋魯史爾仲尼就加筆削乃史外傳心之要典也孟子發明宗旨目為天子之事者周道衰微乾綱解紐亂臣賊子接迹當世人欲肆而天理滅矣仲尼天理之所在不以為已任而誰可五典弗惇已所當叙五禮弗庸已所當秩五服弗章已所當命五刑弗用已所當討故曰天之未喪斯文也匡人其如予何聖人以天自處斯文之興喪在已而由人乎哉故曰我欲載之空言

不如見諸行事之深切著明也空言獨能載其理行事然後見其用是故假魯史以寓王法撥亂世反之正又曰春秋見諸行事非空言比也公好惡則發乎詩之情酌古今則貫乎書之事興常典則體乎禮之經本忠恕則導乎樂之和若權制則盡乎易之變百王之法度萬世之準繩皆在此書

朱熹曰春秋本明道正誼之書今人止較齊晉霸業優劣反成謀利大義晦矣又曰左氏曾見國史考事

頗精只是不知大義專去小處理會公穀考事甚疎然義理却精二人乃經生都不曾見國史

天下有道禮樂征伐自天子出天下無道禮樂征伐自諸侯出至出自大夫出自陪臣無道極矣孔子修春秋誅亂賊正君臣之名分嚴華夷之大防思以有道易無道也然人臣無將將則必誅當時陪臣大夫以及諸侯豈徒將焉已哉書弑者三十六人特亂賊之尤者耳春秋謹微防漸戮已往懼將來其大書特

書誅事誅意一以天王之法律之故曰春秋天子之事而孔子竊取之義蓋指此也觀其首書元年魯隱之元也即書春書王書正月凡春秋所紀載一皆天王之所統一皆正朔之所頒正月乃天王之朔而元年獨非天王之元魯隱之賢可少遁乎蓋將揭禮樂征伐之權以歸之天子而諸侯大夫陪臣其功罪皆據事實書褒貶是非昭然如日星矣是故禮樂掌於大宗伯凡朝聘會盟皆天子之所以敷文命也以諸侯

而私相朝聘要結會盟雖其中不無救災恤鄰之舉
而要之不可以語天子昭德之公征伐掌於大司馬
凡侵伐誅殺皆天子之所以揚武烈也以諸侯而擅
侵與國專殺大夫雖其中不無誅叛討貳之舉而要
之不可以語天子宣威之實連率方伯得賜弓矢斧
鉞以討不庭乃天子之所以樹屏翰也以五伯而摟
諸侯伐諸侯雖其中不無仗義尊王之舉而要之不
可以語天子獨斷之乾剛何也五伯莫如齊桓晉文

其盟于召陵會王世子于首止戰于城濮盟于踐土
天王狩于河陽斯時也臣不得以陵君夷不得以亂
華使天下猶知有天王之當尊功亦偉矣然功之首
也禮樂征伐實非天子所自出而久假不歸誰為之
哉謂其為罪之魁也詎曰不宜故春秋直書其事而
功過自不相掩聖人無容心也所以使人心悚然畏懼
不敢階亂賊之禍者實於茲乎寓矣柰何桓文之伯
業微而楚人滅江滅六滅蕭滅舒蓼入陳圍鄭宋人

及楚人平而夷狄且得以主中國之盟會焉由是會
吳于鍾離至會于黃池夷之憑陵中夏也極矣且不
特夷狄之亡君也魯三桓晉六卿齊陳鮑各已專擅
國柄自大夫專兵戰于大棘至會于向會于戚會于
溴梁而直書大夫盟又書豹及諸侯之大夫盟于宋
則列國之政皆自大夫出也公孫于齊次于陽州公
在乾侯而大夫之僭亂可勝言哉是其實彌遠其
反彌難既書盜竊寶玉大弓又書得寶玉大弓既書

叔孫州讎仲孫何忌帥師圍郟又書秋叔孫州讎仲孫何忌帥師圍郟而陪臣執國命雖大夫亦末如之何也噫自諸侯出十世希不失矣自大夫出五世希不失矣陪臣執國命三世希不失矣魯固無道而列國皆魯也聖人修春秋誅亂賊思以有道易無道也豈得已哉或者乃疑春秋果有貶而無褒矣是不知君臣華夷之間名存實亡猶愈於名實之俱亡也所以功過並錄而彼善於此褒貶自見即如初獻六羽始作

兩觀初也始也其文同也一褒一貶而義自殊矣或
者又以經必待傳而後明焉是又不知聖人自謂見
之行事深切著明非隱語也即如牛傷不郊其僭郊
可知矣大蒐比蒲其僭大蒐可知矣初稅畝作丘甲
作三軍其改田賦可知矣况前書公及邾儀父盟于
蔑後書公伐邾前書及宋盟于宿後書公敗宋師于
管前書虞師晉師滅下陽後書晉人執虞公如此之
類皆可互觀苟必于傳之詳焉如許世子雖弑其君

而藥之嘗與未嘗未可知也是聖人竊取之義不足
信也已雖然誰毀誰譽直道而行知我罪我何與也
此聖人之心也安得獨抱遺經究始終者與之共學
春秋之大義與之共學聖人直道而行之心哉

春 秋 四 傳

左氏傳

公羊傳

穀梁傳

胡氏傳

春秋四傳

孔子修春秋不過因舊史文而筆削之取其足為世道之勸懲者存之云爾苟足以維世道正人心則事何取于不可窮詰何取于不可測識哉是故其辭約其義盡一開卷而是非善惡瞭然具在不待考之傳記而後詳也邵康節云春秋孔子之刑書也常即法家之斷刑獄者例觀之如擬某人以強盜得財之律即信其盜財屬實況春秋之刑書皆經孔子斷擬若

必待傳記而後詳其事精其義焉不惟書法隱而不明且疑其所擬不當果將翻駁招案而出脫之乎抑欲別為比擬而深罪之乎一字之間多為條例旁引曲證又欲深文以為能乎要皆不信聖人所擬之律故欲詳審招案以究其所以案律之由也篤信聖人者顧如是哉後世所崇信者莫如左公穀三傳使春秋非傳不明則孔子何不只存舊史而加以筆削反滋後人之惑也耶縱使三傳不可盡廢而其各有長

短可無辨乎故以言其長則事莫備於左氏例莫明於公羊義莫精於穀梁以言其短則左氏之誣公羊失之亂穀梁失之鑿何也如載惠元公元妃繼室及仲子之歸于魯則隱公兄弟嫡庶之辨攝位之實可按而知此左氏叙事之備也若來賄仲子以為預凶事則誣矣王正月以為大一統此公羊之明於例若母以子貴媵妾許稱夫人則亂矣段弟也弗謂弟公子也弗謂公子賤段而見鄭伯之處心積慮在於殺

弟此穀梁之精於義也若曲陳義例以大夫曰卒為
正則鑿矣昔人謂左氏曉事該博是做文章之人公穀
却是不曉事儒者說道理處不甚差此語良近之今
合觀三傳之異同如僖公三年正月不雨左氏謂之
不為災公羊謂之記異穀梁謂之勤雨各以已見自
為一說皆不知春秋凡經時不雨告廟則書之義也
析觀三傳之乖謬如公羊謂求車求金為非禮而不
知責諸侯之不貢也謂大閱大蒐為罕書而不知譏

列國之僭王也穀梁謂秋蒐於紅為正而不知蒐本
春田不可用於秋也不納子糾為內惡而不知讎敵
不可得而容也左氏以郎之狩為禮而不知其廢國
務而遠田獵也四國伐鄭以為圍鄭狄人入衛以為
滅衛經何以不書圍與滅也至如仲子一也公羊以
為惠公之妾穀梁以為惠公之母子氏一也公羊以
為隱公之母穀梁以為隱公之妾尹氏一也左氏以
為夫人公羊以為世卿姑舉此一二言之三傳果可

盡信否乎三傳果足以發明經旨否乎經不得三傳則不明否乎若後三傳而為世所最尊信者莫如胡傳其中未能詳舉試即其所闕之大者畧陳之如春王正月謂以夏時冠周月在孔子不免生今而反古矣以王不稱天為貶周以桓不書王為歸罪天子是孔子以匹夫而黜天王也滕本侯爵因其黨惡來朝故貶而稱子是孔子假魯史用五刑奉天討故得以擅黜陟諸侯之爵位也夫聖人本欲懼亂賊正人心

而身為亂賊之尤有是理哉況其釋經者十之三而
釋傳者十之七昔人謂胡氏春秋傳有牽強處又有
謂其以義理穿鑿豈欺我哉嗚呼傳愈多而經愈晦
又何以傳為也予嘗聞春秋名分之書也春秋性命
之書也知春秋為名分之書而貶周黜王何有於名
分之正知春秋為性命之書而載事比例何有於性
命之精安得讀春秋者惟知尊信聖經而不為後儒
見聞所牴則其義固已瞭然於經文中也嗚呼人皆

輕於叛經而重於叛傳何哉

讀春秋

春秋王道也天下無二尊是王道也禮樂征伐會盟
朝聘生殺之權一出於天子而無有一人之敢衡者
無有一人之敢作好惡作威福是王道也是故大宗
伯以賓禮親邦國而以盟會發四方之志天子巡守
諸侯既朝則設方明是會盟者天子之權也其或不
出於天子而私會私盟者罪也故春秋凡書會書盟

者皆罪之諸侯朝於天子而諸侯之自相與也有聘禮無朝禮凡其不朝於天子而私相朝者罪也故凡春秋之書如書朝者皆以罪其朝者與其受朝者九伐之法掌於司馬而天子賜諸弓矢斧鉞然後得專征伐雖其專之亦必臨時請命於天子而後行是侵伐者天子之權也其不出於天子而私侵私伐者罪也故凡春秋之書侵書伐者皆罪之諸侯之大夫公子雖有其罪必請於天子而後刑殺焉其不請於天

子而顛殺者罪也故凡春秋書殺大夫殺公子者皆
罪之夫侵伐有貪兵有憤兵有應兵有討不睦有以
夷狄侵中國有以中國攘夷狄有以中國借夷狄而
戕中國者故戰有彼善於此者要之無義戰盟會有
解讎有固黨有同欲相求有同力相援有同患相恤
有以夷狄受盟有以夷狄主盟者故會盟有彼善於
此者而要之無義會義盟殺大夫有誅叛有討貳有
懷諫有借以說於大國有為強臣去其所忌故殺大

夫有彼善於此者要之無義殺是故春秋自于稷澶
淵兩會之外並不書其故而至于盟會侵伐則絕無
一書其故者非畧也以為其會其盟其侵其伐其戰
既足以著其罪矣不必問其故也殺大夫必名亦有
不名而但書其官如宋人殺其大夫司馬者亦有併
其官不書如曹殺其大夫者此非畧也以為義繫乎
其殺之者而不繫乎其殺者義繫乎其殺之者則其
殺也足以著其罪矣義不繫乎其殺者則不必問其

為何人與其為罪無罪焉可也說春秋者不達其意而瑣為之說曰其會也以某故殺某大夫也以某故至於盟戰侵伐亦是皆無益於春秋也而徒為蛇足之畫者夫春秋經世之書也其經世也以正亂賊也易曰臣弑君子弑父非一朝一夕矣不早辨也說春秋者亦云人臣無將夫人臣而竊其君侵伐會盟刑殺之權其為將也甚矣人臣竊其君侵伐會盟刑殺之權而久假焉而莫之歸也其為漸也甚矣故臣

子至於推刃於其君父而春秋書某國弑其君某某
人弑其君某者是弑之成也是春秋之所痛也人臣
而竊其君會盟侵伐刑殺之權是弑之漸也將也是
春秋之所辨也孔子嘗自言之矣曰天下有道則禮
樂征伐自天子出天下無道則禮樂征伐自諸侯出
無道而至於自大夫出無道而至於陪臣執國命嗚
呼是春秋之勢也挈其漏於陪臣大夫者而還之諸
侯挈其漏於諸侯者而還之天子是春秋之撥亂而

反之正也夫周自東遷以前雖王室已不競矣而其
權固在也幽弒而平徙岐豐之地委為草莽瀍洛之
外聲教阻絕于是尾大之勢成而諸侯橫變易禮樂
馮衆暴寡大小相朝強弱相劫無一不出於諸侯者
而天子曾不得尺寸之權矣蓋周之盛王道行頌聲
作而其可見者莫如詩雅蓼蕭湛露是諸侯之會同
於天子者也彤弓是諸侯聽征伐之命於天子者也
出車采芣是天子之自為征伐而四夷不敢侵叛者

也故曰詩亡而後春秋作詩未亡天子之權存詩亡
天子之權喪春秋收既喪之權而還之天子者也春
秋所以接詩亡之後雖一日不得緩也文宣而下則
諸侯又不能自執其權而大夫之交政於中國者攘
攘矣三桓六卿七穆孫甯魚華陳鮑擁兵樹黨而主
勢孤矣葬原仲而私交始矣作三軍舍中軍而魯之
權罄於大夫矣行出奔孫陽州孫越入彭城入朝歌
入晉陽而大夫之為禍烈矣蓋天下之勢愈下而春

秋之治也愈詳桓僖以前列國之大夫惟特使而與魯接者則名之而會盟侵伐則大夫未有以名見者夫救徐大夫特將也翟泉大夫特盟也春秋第曰人曰大夫而已不以名見也若此者非畧也以為不繫乎大夫也文宣而下侵伐會盟大夫未有不以名見者雖溴梁之會其居在也而大夫盟書難澤之盟居既盟也而大夫盟書若此者非煩也以為繫乎大夫也不繫乎大夫雖夷吾隰朋狐偃衰之勳且賢未嘗以

名見焉繫乎大夫雖劣如樂厲荀偃高厚華閱則瑣
瑣以名見焉不繫乎大夫雖其君不在而大夫特盟
則亦弗詳焉翟泉是矣繫乎大夫雖其君在而大夫
綴盟則亦詳焉溴梁雞澤是矣不繫乎大夫雖主帥
亦畧而人之桓僖以前侵伐書人者是矣繫乎大夫
雖偏裨亦牽連而名之鞍之戰是矣其弗詳大夫者
以專治諸侯之為亂賊也其詳大夫者以併大夫之
為亂賊也說春秋者不達其義而曰人大夫貶也夫

書人為貶彼鷹閱之徒以名見者乃為褒也耶惟曹
薛滕許之大夫始終書人說春秋者曰小國無大夫
非也夫此數君者且為人役之不暇而未嘗敢執天
下之權也而況其大夫乎蓋不繫乎其大夫是以終
始人之而弗詳今日書人為貶則是齊晉諸國之大
夫偏受褒而曹薛滕許之大夫偏受貶耶侯犯南蒯
弗徂陽虎之徒出則大夫又不能自執其權而陪臣
實執之矣墮郈書墮費書圍成弗克書竊寶玉大弓

書得寶玉大弓書而春秋之正陪臣又詳矣故孔子
欲往公山佛肸之召而曰吾為東周云者即春秋書
墮費墮郈意也是春秋之終也或曰盟葵丘盟踐土
師于召陵城濮說春秋者以為聖人予之也今亦曰
是禮樂征伐自諸侯出也而奪焉可乎曰是不然矣
桓文之未出也權雖不在天子而諸侯亦未能盡得
天子之權也蓋其權散桓文之既出也則權既不在
天子又不在他諸侯而桓文獨盡得天子權也蓋其

權聚譬之主人有千金馬而竊之者十人雖金已不在主人矣然十人而人得百金馬尚未足以當主人也而竊之者一人苟一人而併千金馬則是疑於主人也權之散臣悖於主權之聚臣疑於主故較利害則權之聚而交鬪猶不若權之散而未有所屬隨之屯曰隨有獲人隨而我獲之未害也而謂之凶豫之坤曰由豫由我致豫未害也而六五以為貞疾故桓文者臣之凶而主之所以貞疾者也且桓文以前諸

侯固有相朝者則亦一二小邦而已猶未有六服羣
然相朝者固有私盟會擅侵伐者則亦一國兩國相
讎相結而已未有舉中國而聽於一人未有十餘國
而共攻一國者是天子之權未有所屬也桓文之興
五年一朝三年一聘而諸侯之玉帛相率而走於其
庭天子黼屨之前乃不得一人秉圭而北面者彼齊
晉亦偃然諸侯之朝已而終其身未嘗一涉天子之
庭也衣裳之會兵車之會未嘗有一介請于天子也

是故糾合諸侯同獎王室未有如葵丘踐土者諸侯之羣然役屬臣僕於諸侯亦未有如葵丘踐土之甚者戎狄攘斥中夏又安未有如召陵城濮者而樓諸侯以伐諸侯亦未有如召陵城濮之甚者說春秋者不達其意而曰會于某盟于某是聖人以諸侯授之齊晉也夫王室之不競也諸侯既已盡折而入於齊晉矣聖人不能挈而還之天子也其又推而授之以益其逼也耶夫權自諸侯出不問其如何而均謂之

無道敵國相征不問其如何而均謂之無義不知禮樂征伐之出於桓文也其為道耶其為無道耶桓文之戰其為義耶其為無義耶使桓文而誠於勤王誠於攘夷急病而其柄則倒持也其分則上陵也聖人猶必律之以法而桓文且將為法受惡矣况其借名勤王而實則自殖陽為急病而陰欲養亂哉滅譚滅遂本以自肥執曹界宋為譎已甚桓之末年侈然有封禪革命之心而文至於請隧以葬此其去間鼎者

無幾耳又何以責楚也然則聖人所稱民免於左社而仁之何也曰是聖人之顓論功也而春秋者顓以明道也穀梁氏曰仁不勝道存王室也然則說春秋者曰謹華夷之辨何也曰此誅亂賊之一也夫春秋之所夷者吳與楚楚之先鬻熊為姬文師國於江漢之間而太伯端委以臨吳蓋皆神明之胄矣荆人之道問周之亂革子以王叢毒上國吳亦相効而王是亂賊之由也是以春秋從而夷之春秋諸侯中顯然

為逆者莫如楚吳其陰逆而陽順者莫如齊晉如斷
獄之家吳楚則功意俱惡齊晉則功遂意惡功意俱
惡故聖人顯誅之顯誅之故其辭直如卒不書葬君
臣同詞之類凡此皆直辭也功遂意惡故聖人陰奪
之陰奪之故其辭微如遷邢於儀夷城楚丘狩河陽
之類凡皆微辭也大小雅未廢而四夷不敢交侵小
雅盡廢而後四夷交侵春秋始書荆入蔡以獻舞歸
則其躅躅之勢已見桓文奮而扼之其鋒稍阻文也

沒而晉霸衰而楚人之圖北方者遂日長而不可制
是故春秋書荆入蔡此霸之未興而楚獨中國之始
春秋書次于厥貉此霸之既衰而楚窺中國之始蓋
桓文之所以扼楚者其力有難易而楚與中國之所
以盛衰其幾有倚伏桓起于海濱而所從者宋衛陳蔡
皆弱國故謀之十餘年結江結黃連十二國之師而
後能服楚于召陵文據表裏山河之固而所從者齊
秦皆勁敵故反國一年僅連三國之師而遂能克楚

于城濮一戰而殺其專兵之將然晉之克楚也得策于結秦而晉之不競于楚也失策于讎秦自殺之後而秦晉相讎殺者歷四五世戰彭衙戰令狐戰河曲積十餘戰而不解是晉人自失一強援自生一強敵失一強援則其氣力不完強敵伺近則其勢不暇於畧遠故晉霸之衰而楚益橫者殺之役實然說春秋者乃曰殺之役春秋許晉襄繼霸吾不知也夫楚莊者又蠻酋之雄耳而遠交秦巴近攻陳鄭則是晉之

讎秦非特生一強敵乃又借盜以兵也春秋書楚人
秦人巴人滅庸而楚之謀益狡矣書楚子圍鄭而中
國虎牢之險淪于夷矣書宋人及楚人平而南北衡
矣天下之勢一變也雖然于時諸侯固有附楚者而
猶未敢公然附楚也晉雖已不得盡得諸侯而猶未
肯甘心以諸侯委之楚也蜀之盟謂之匱盟蓋諸侯
猶揣晉人知之也弭兵之說倡而南北之從交見於是
中國諸侯公然朝楚向之玉帛於齊晉者盡在楚矣

申之會空中國而聽焉齊晉之所連以扼楚者今楚人連之以扼中國矣申之會諸侯獻六王之禮宋之會號之會長楚於晉則是諸侯甘心為夷後而晉人甘心以諸侯委於夷也天下之勢又一變也至於吳越交兵而夷禍極矣書伐邾入州來會黃池入吳而春秋所以治夷者又詳矣是春秋之終也或曰楚橫而齊晉扼之則是中國果不可無桓文也今日禮樂征伐自諸侯出也而奪焉夫賴人之功以紓患靳人

之權以資敵是責鷹鷂之搏而繫其足也不亦迂乎
曰不然吾又有以譬之今有僕於此鳩黨鑄兵而主
人弗能令也然盜夜入其室則其僕揭兵嘯黨而逐
之以僕為不善也然而足以逐盜以僕為善也然而
足以抗主故天下無霸而至於四夷縱橫而莫之禁
者非天下之幸也天下有霸而至於臣疑於主而莫
之怪者非天下之幸也夫春秋之事齊桓晉文是也
齊桓晉文之功定而王道明矣王道明而亂賊懼矣或

謂春秋誅亂賊者誅其弑君者也曰若是則春秋所誅者止於弑三十六君之人耳其亦狹矣然則所謂誅亂賊者何也曰治弑也治諸侯之專也治大夫也治陪臣也治強也凡無王道者皆亂賊之道也

春秋大旨

玩聖人經典須先提揭大綱得聖人作經本旨則萬目犁然具舉而大義自不容掩况春秋尤經聖人手筆而為萬世提綱書法也惡可各以一人意見牽扯

義理以相穿鑿傳會匪特聖人筆削大義不得昭明於天下而反使聖人得罪名教咸朦然莫之覺焉吁可痛哉蓋後儒欲尊孔子不曰聖人以天自處則曰聖人以天子之權與魯夫孔子亦人也止曰天生德於予曰知我其天何為便以天自處乎孔子亦庶人也曰天下有道則禮樂征伐自天子出天下無道則禮樂征伐自諸侯出至政出大夫國命執于陪臣蓋屢傷之矣未聞與奪天子之權反自庶人出也矧孔

子懼亂賊作春秋故春秋成而亂臣賊子懼觀當時
列國僭亂極矣未有遽改周家之正朔者乃謂孔子
欲行夏時故以夏時冠周春月而孔子身為亂賊之
尤矣桓不書王黜天王也滕杞書子貶諸侯也其於
大夫陪臣又不待言至不書秋冬則天且在其貶黜
中矣從古僭妄未有至此極者乃以加諸孔子於心
安乎哉嘗聞孔子曰今天下車同軌書同文行同倫
曰吾學周禮今用之吾從周曰為下不倍且曰誰毀

誰譽斯民也三代直道而行也信斯言也吾固確信孔子必不敢黜天王貶諸侯與奪當時卿大夫以至敢于改周正朔而必行已之志也然則筆削予奪非孔子而誰哉蓋魯之春秋與晉棄禱祝一也其事則齊桓晉文其文則史而其義則孔子自謂竝竊取焉可見文皆史氏之舊文孔子未嘗有增損也特擇其有關王迹者筆之無關王迹者削之故游夏文學無所容其贊也雖一字嚴于袞鉞實合數句以成其文

雖每條自為始終實會數條以詳其事惟筆削定而
名分秩故善惡明而法紀昭此所以大義燦若日星
不待孔子褒之貶之人心勸懲自有不容已者在矣
是聖經本簡諸傳必欲求諸繁聖經本易諸傳必欲
求之難且緣飾以聖賢之義理綱維以帝王之法度
附和以儀秦之智術參錯以孫吳之兵機斷案以申
商之法律推究愈精愈深而去經愈遠雖其間多言
而中或有得其情者要亦齟齬然指摘推尋於一字

之間而不知大義未免放飯流醢而問無齒決均於
大綱無當也

潢

淺陋固拙豈敢操戈入室以攻訐諸

儒之短哉但據一竅之明故信孔子從周心志必不
敢易正朔黜天王貶削諸侯於二百四十年後據義
理憑意識以改厯朝信史故揭大綱以歸諸簡易俾學
春秋者讀其本文是是非非一開卷而人人可自得
之矣至于一字一義不徒四傳有可採者雖諸家不
敢悖也雖然孔子於春秋之義且謂之竊取故甘冒

僭踰之罪亦取其意而名之為竊義云

嘗誦孔子之言曰述而不作信而好古曰吾猶及史之闕文也曰為下不倍曰愚而好自用賤而好自專生乎今之世而反古之道災及其身者也曰吾學周禮今用之吾從周學孔子之學者真信孔子數語則春秋不待傳註而可明矣何也孔子自謂吾志在春秋便可以觀孔子之志也然一字之褒榮踰華袞一字之貶嚴踰鈇鉞是謂字句皆孔子所自筆削而褒

貶王侯大夫諸人者也何有於述而不作信而好古
耶不知褒貶皆舊史也孔子特擇其有關名教者筆
之無關名教者削之而已信述皆實言也即如謂舊
史于隱公原有即位之文孔子削之以貶隱也桓公
三年原有春王之文孔子削之以貶王也桓四年原
有秋冬之文孔子削之以黜天也他如黜諸侯責大
夫之文不可勝數則又何有于闕文哉倍上反古亦
至矣何有于從周哉不知即位春王秋冬之類皆舊

史之闕文也信以傳信疑以傳疑皆史闕文之實事而孔子不敢削即位以貶君不敢削春王以黜王不敢削秋冬以黜天不敢改侯爵以黜諸侯不敢書名削名以黜諸大夫纔信史官皆信史也春秋皆實書也孔子從周之志非虛言而為下不倍生今反古皆聖人所必不為者也如此則孔子之心纔可以暴白於萬世而不為諸傳所誣矣觀昭公娶同姓本不知禮然答陳司敗之問則寧以過自歸也而敢于黜君

王乎陳恆弑君尚沐浴請討之矣況敢以弑為薨而有所諱乎惟其舊史原書弑者雖國君不敢諱原不書即位者雖國君不敢加故曰誰毀誰譽斯民也三代之所以直道而行也又何忍以倍上反古加聖人耶

孟子歷叙羣聖統緒自舜禹文武周公而下直以孔子作春秋繼之且曰予未得為孔子徒也予私淑諸人也他日又曰禹抑洪水而天下平周公兼夷狄驅

猛獸而百姓寧孔子成春秋而亂臣賊子懼曰吾欲承三聖者所以願學孔子無如孟子則深知孔子之春秋亦莫踰於孟子矣况其相去時世甚近而說孔子成春秋之意為獨詳乎曰世衰道微而邪說暴行有作臣弑其君者有之子弑其父者有之孔子懼作春秋春秋天子之事也曰春秋無義戰彼善於此則有之矣曰王者之迹熄而詩亡詩亡然後春秋作晉之棄楚之禱杙魯之春秋一也其事則齊桓晉文其文

則史孔子曰其義則立竊取之矣果真信得孔子之
春秋為誅亂賊而成則凡謂孔子黜君王貶當時諸
侯大夫而以亂賊之尤加諸孔子者不可信也真信
得王者之迹熄而詩亡詩亡然後春秋作則知王迹
莫大乎名分而春秋之作惟以尊王迹而已矣真信
得魯之春秋與晉棄楚禱杻均之為史則從古史官
書法必有一定之例而其所記者不過當時之事而
已真信得其事則齊桓晉文其文則史而孔子未嘗

增減一事一字則其所當注意講求存王迹之義而
已矣自今觀之凡朝聘會盟侵伐戰取圍獲敗滅崩
薨卒葬錫命贈賻郊雩蒐狩執殺出奔之類孰非列
國之事乎凡各國年月時日一以魯國為主諸侯朝
聘會盟侵伐一以魯君為首爵號名字或書或不書
各隨事之大小詳畧而悉嚴其詞孰非史氏之文乎
若夫據事直書而莫非綱常之所係因文覈事而一
皆名分之所關惟屬詞比事其義自見此則孔子所

謂竊取之義也。即所以繼詩亡而存王迹，與晉棄楚
禱杙其事文雖同義則殊也。若曰事有不詳，非傳不
足以考其事之顛末，是春秋為簡畧之史矣。文有不
顯，非傳不足以見其文之精深，是春秋為晦昧之詞
矣。義雖至精，如書國書爵書人書名字同一事也。所
書之文又書與不書各異，故方用此字以為之賞，即
用此字以為之刑誅。心誅意各有差別，而深密刻核
非傳則不能窺。此方書之以為定例，彼即不書以為

變例一褒一貶各有微旨而倏忽變動非傳則不能測譬諸後世舞文弄法之吏詭譎百出各借律例以斷決人之生殺而春秋皆非義之義矣孔子竊取之義顧如是哉噫孟子之言信不虛也春秋大義惟在正名分存王迹事也文也一仍其舊而孔子未嘗增減一字以為之褒貶則春秋本自光明正大凡善惡刑賞昭然于簡編之中矣何以紛紛多說為哉

春秋書法謂當時史官無褒貶予奪不可也或者即

謂書時月者貶也書日者褒也是以日月為褒貶矣
果春秋之義乎信斯言也則當以日月為定例也姑
舉諸儒之見言之彼徒見會盟卒葬有書日不書日
不可一例拘故曲為之辭也是故盟不書日一也或
以為渝信或以為危為美何不同乎葬以過時而日
隱也當時而日危之也然過時而隱直指齊桓言之
彼時公子爭國危之隱之可也衛穆宋無齊桓之賢
無爭國之患亦過時而書日果何可隱而宋穆之日

葬又何可危乎公子益師卒左氏謂公不與小斂明
矣而皆書曰公羊曰遠也然公子區亦遠矣而亦書
日穀梁曰惡也季孫意如亦惡矣而亦書日何歟胡
氏則又皆以為非而歸諸恩數之厚薄焉然得臣之
於宣公非薄也意如之與昭公非厚也而皆得書日
又何歟所以益師之卒不日四家各持一說不免互
相矛盾矣惟程伊川先生曰其不日者古史簡畧日
月或不備而春秋因之是也故以事係日以日係月

以月係時此史家之通例也事成於日者書日事成於月者書月事成於時者書時或有宜月而不月宜日而不日者皆史失之也甲戌己丑中有遺其事者皆史闕文之意也日月之書不書於褒貶之義何關係哉雖然亦有因日月之前後而知其是非者則亦不可廢也如莊三十一年春築臺於郎夏築臺于薛秋築臺于秦三十二年春城小穀則見其纔閱三時而大功屢興也宣十五年秋螽冬蟧生則見其連三

時而災害薦作也莊八年師次于郎夏師及齊師圍
郕秋師還則見其閱三時而兵勞於外也凡此之類
不於書時見之乎如桓二年秋七月杞侯來朝九月
入杞則見其來朝方閱一月而遽興兵以入之也昭
七年三月公如楚九月公至自楚則見其朝夷狄之
國閱七月之久而勞於行也僖二年冬十月不雨三
年王正月不雨夏四月不雨則見其閱九月而後雨
也凡此之類不於書月見之乎如癸酉大雨震電庚

辰大雨雪則見八日之間再見天變也辛未取郕辛
巳取防則見旬日之間取二邑也壬申御廩災乙亥
嘗則見其災餘為不敬巳丑葬敬嬴庚寅克葬則見
其明日乃葬為無備丙午及荀庚盟丁未及孫良夫
盟則見魯人先晉而後衛巳未同盟于雞澤戊寅及
陳袁僑盟則見晉之先盟諸侯而後盟大夫凡此之
類不於書日見之乎此而觀之年時月日其關係於
史者如此而已若以日月係春秋書法之褒貶則皆

諸家臆說也不可不察

春秋書法於諸侯大夫爵號名稱所書各有不同諸
傳每于書爵書字者便以為褒于書名者便以為貶
似乎褒貶之法係乎爵號名稱之所書矣然有當書
字原只書名當書名者原却書字當書爵者或止書
國書人當書人者或又書爵則又各拘一見而曲為
之詞其自相抵牾不可勝說矣是故於穀鄧書名則
曰貶其朝弑逆之人矣紀侯獨非朝弑逆之人乎見

其書爵則為之解曰志不朝桓也於宰咺書名則曰貶其賄諸侯之妾矣榮叔獨非賄諸侯之妾者乎見其書字則又曰罪在天王而無貶也於滕薛書爵則曰先朝隱而褒之矣滕朝桓則即降侯稱子謂其朝弑逆之人也何貶一人至于歷代子孫皆莫之宥乎見荆變而書楚楚變而稱子則曰進夷狄也夫中國而夷狄則夷狄之矣夷狄而中國則亦中國之乎見季札書名則曰為其辭國生亂也秦伯夷齊非辭國者

乎何為以至德稱之得仁許之而札獨辭國見敗也
胡氏又謂書晉侯以常情待晉襄也書秦人以王事
責秦穆也紛紛不一要皆諸儒臆說各執一見以明
經而經反因之以晦塞矣然則名稱爵號可盡廢而
不講乎蓋時變有升降世道有盛衰善觀時世者亦
可因是以會通也如楚一也始書荆繼書楚已而書
子吳一也始書吳繼書吳人已而書吳子于以見夷
狄之寢盛矣魯暈鄭宛詹始也大夫猶不氏其後則

大夫無有不氏者鄭段陳佗衛州吁始也皆名其後則雖弑君之賊亦有書氏者于以見大夫之漸強矣始也曹君無大夫其後則曹莒皆有大夫于以見小國之大夫皆為政矣始也吳楚之君皆書人其後則吳楚之臣亦書名于以見夷狄之大夫皆往來于中國矣諸侯在喪稱子有稱子而與會伐者于以見不用周爵而以國之大小為強弱矣會于曹蔡先衛伐鄭則衛先蔡于以見當時諸侯皆以目前之利害而

不復用周班矣幽之盟男先伯淮之會男先侯戚之
會子先伯蕭魚之會世子長于小國之君于以見伯
者為政皆以私意為重輕而無復禮文矣垂隴之盟
內之則公孫教會諸侯召陵侵楚之師外之則齊國
夏會伯主于以見大夫敵于諸侯而莫知其非矣此
觀其會通凡爵號名字之異同或事有小大詞即因
之以詳畧或蒙上文而殺其詞者有之不可以一例
拘也明矣

春秋首書元年乃魯隱公紀國之元實周平王四十
九年也轉引乾元坤元以明人君之用且以體元調
元歸乎君相豈知非天王不可以稱元魯隱特侯國
耳何為僭天子之元乎使諸侯可以改元則國各一
元不將千八百元乎說者曰孔子魯人也故以天子
之權與魯然天子之權誰得而與誰得而受孔子特
庶人也安能以天子之權與魯侯哉況以諸侯之元
加諸春王正月之上是乎非乎苟謂一字一義悉出

諸孔子所裁定則春秋之作本以正名分存王迹也何
為顛倒王侯名義一至此乎以予觀之諸說呶呶皆
諸儒之陋說也何也天王諸侯之名分不可亂諸侯
無改元之禮而以侯國之元冠于春王之上必非孔
子所改定也要皆史氏舊文孔子不過據其事與文
而直述之是也非也人心之公義昭然天地間自不
可得而掩矣或謂諸侯稱元自魯隱公始以後十一
君紀年皆係之魯者隱公啟之故係元於魯隱紀事

之首所以深著其無王之罪也春秋始於魯隱之元年蓋謂此歟至謂仲尼為素王丘明為素臣故得專乎賞罰予奪之權為此言以啓後世儒者僭妄之弊其害為尤甚也知孔子竊取之義者其慎辨之

首書魯隱之元年而復書春王正月何也蓋魯國之史其所書者實列國之事也匪天王曷足以統之哉但論時論月歷代諸儒人各一說不以為改時則以為改月或又以為時月之俱改予嘗據易書詩禮諸

書以證其時月之未改矣茲復詳之彼以為改時者則以冬十一月為孟春二月為孟夏五月為孟秋八月為孟冬矣以為改月者則建子為正月建丑為二月建寅為三月以至建亥為十二月矣以為時月之俱改者則冬十一月為正月冬十二月為二月春正月為春三月春二月為夏四月焉以為改月不改時者則冬十一月為冬正月冬十二月為冬二月春正月為春三月焉又以夏時剋周月者則以周雖時月

俱改而孔子欲行夏時故于周所建之月自子迄亥
為一年乃以夏人所尚春夏秋冬之序加于建子起
歲之月矣殊不知三代雖異建而時月未嘗改也
盍觀諸三百篇之詩乎以周之時訓證周之時令不
亦可乎七月流火之詩諸儒皆以為周公訓告成王
乃夏后氏之邠俗故其時月皆夏后氏之時月也且
勿之論矣如詩云春日遲遲卉木萋萋倉庚喈喈采
芣苢云維暮之春亦又何求如何新畲於皇來年

將受厥明若以為時之改也則建丑月為仲春矣安
得日之遲遲木之萋萋乎建寅月為暮春矣安得來
牟之麥迄用康年乎信乎時未改也詩云二月初吉
載離寒暑日月方除日月方輿云四月維夏六月徂
暑秋日淒淒冬日烈烈若以為月之改也則建丑為
二月矣寒暑安得兩分日月安得方除而方輿乎建
卯為四月建巳為六月矣卯月可以為夏巳月安得
暑之遽徂五六月安得日之淒淒八九十月安得

日之烈烈乎信乎月未改也若又以為時月之俱改
焉是以逆天違時加武周矣何也時月一改則木屬
子丑寅火屬卯辰巳金屬午未申水屬酉戌亥况武
周縱能改時令月數而不能使萬物之發生各以其
時何有于欽若昊天敬授人時哉若以為夏時剋周
月也是以亂賊之尤加孔子矣何也在諸國雖秦會
盟侵伐之典僭刑賞生殺之權猶未敢改周正朔孔
子乃生今反古行夏之時使周王之時訓至此盡變

易之矣孰謂孔子無忌憚一至此耶即此觀之時月未之改也昭昭矣然必書春王正月何哉蓋書春書月所以尊天時也凡所書如夏城中立夏城郎冬浚洙冬築郿春新延廡春築臺于郎八月築鹿囿正月烝夏五月烝秋八月嘗春正月卜郊夏四月五卜郊秋八月大雩秋八月大閱春二月焚咸丘秋蒐于此蒲春正月不雨夏四月不雨六月雨自十二月不雨至于秋七月春無冰之類各以天時而考其所行之

事孰遵時也不待褒之貶之而其事之善與不善不可掩矣書王書天王所以尊周也凡其所書如天王狩于河陽公朝于王所天王使宰咺來歸惠公仲子之賄公及邾儀父盟于蔑公會戎于潛公如齊觀社丹桓宮楹刻桓宮桷初獻六羽初稅畝初作丘甲舍三軍盟于召陵會王世子于首止會于葵丘戰于城濮盟于踐土之類各以王度而考其所行之事孰尊王也孰悖王也不待褒之貶之而其事之善與不善

自不可掩矣是故善學春秋者以天時觀人事而人事之得失何必刻意以誅求以王法治侯邦而侯邦之是非何待深文以極治此春秋所以為簡易也柰何諸儒各以己意揣摩聖訓一字之間彼以為褒此以為貶于天時王章咸莫之省也何怪乎春秋之旨愈傳而愈晦哉

國君初立必書即位禮也春王正月之下必書即位者春秋之書法也然而有書有不書何哉觀魯隱不

書即位三傳謂隱有讓桓之志不行即位之禮故不書
似乎傳其事之實矣考之經傳隱實在位十有一年
安有始焉不即位而可在位以秉其君國之政乎又
安有不即位而可以改元者乎胡氏乃謂內無所承
上不稟命則不書故春秋首以王法繩隱公也似乎
得其義之正矣考之魯十二公均之不稟命也何獨
於隱而責之深乎列國諸嗣君即位曾有一人請命
天王者乎或曰隱公攝也故不書即位且以攝之義

言凡國君必上告祖廟下臨百官禮居喪不祭以嗣
王雖在廟而不敢自祭故冢宰攝而祭之耳苟無祭
主為誰而攝其祭乎禮嗣君居喪三年不言百官總
已以聽命於冢宰以嗣君雖朝羣臣而未有命戒故
冢宰攝而命之耳苟無嗣君為誰而攝其朝乎伊尹
之攝以有太甲在桐宮也周公之攝以有成王在襁
褓也故伊周末敢居商周天子之位也明矣隱公在
位告廟臨臣稱之邦人曰魯君稱之異邦曰魯侯書

之史冊曰魯公乃謂之居攝不書即位吾不知之矣
或曰隱之攝將以讓桓之嫡也據古禮諸侯一娶九
女苟元妃卒則次理內事惠公既有元妃孟子矣仲
子不過因其手文而惠公自立為夫人耳仲子果可
以為嫡乎仲非嫡母桓可以為嫡子乎如此則隱為
庶長矣春秋果一字一義皆出聖筆則莫先於嫡庶
之辨矣隱雖有讓桓之志安在其為攝乎况隱謂之
攝矣莊閔僖俱不書者何也然在莊則以為君弑而

子不忍行即位之禮在定則以昭公喪未至猶有說也而閔僖則止謂之不請命焉蓋在桓宣弑辱之人均之未請命而猶得書也何獨於閔僖而過責之乎宣公本為弑君者所立亦書即位乃曰書之以著其自立之罪則愈不通矣或者又曰舊史皆書而不書者孔子削之耳此尤不通之甚也何也弑逆如桓如宣皆莫之削而何獨求備於隱公數君也要皆求之不得其說又從而為之辭故諸傳各一其見也然則

其義何居蓋一年不二君逾年始改元者禮也但國家事勢不一或有舊君薨而嗣君遽即位者未必人即位於改元之正月也或即位於元年正月者則書之或即位於君薨之年者則不書亦一也觀定公已書元年至六月始書即位亦可證矣且書與不書皆舊史之文也孔子何所庸其意見而獨削夫隱閔僖三公哉

經于列國書爵書人不一而足諸傳則以為書爵者

褒之也尊之也宜乎同一尊崇褒美之義也然同一
楚子伐鄭在宣四年則謂特書爵以予之也宣九年
冬便謂書爵見其暴陵中華宣十年冬則謂書爵乃
直辭不以楚為罪焉書楚子入陳則謂楚子能討賊書
楚子入徐則謂書爵非予之也以不誅誅之也即一
楚子之爵或以為褒或以為貶或以為無褒無貶他
如桓十年冬書齊侯衛侯鄭伯來戰于郎乃謂稱爵
以著其罪姑舉此一二以例其餘則書爵一款何褒

貶誅罪皆寓此一字之間如天淵之相懸乎經文書人諸傳皆以為貶也如齊人侵我西鄙楚人滅夔楚人圍宋其貶之也明矣然楚人殺夏徵舒則曰人衆也人人得而誅之也荆人來聘則曰嘉其慕義自通故進之也此又以書人為予之之辭焉然其義尚多不可一端盡曰有寡而稱人者有衆而稱人者有微而稱人者有諱而稱人者有國亂無主而稱人者不惟貶黜諸侯大夫不足以該此人字之意而予之亦

無定論也只此書爵書人二者竟無定義而其他義例又不可勝數矣是故古者史官必有書法如諡法之類今皆不可考矣因其文覈其事以論其世雖左氏未必盡當而他又何足據哉

諸侯薨大夫卒禮也春秋于魯君皆書薨於列國君皆書卒列傳謂書薨尊魯君也書卒貶諸侯之失臣道也此皆舊文未暇悉論然魯君令終曰薨而被弑者亦書曰薨何哉傳者謂其諱國惡也且曰均之為

薨而其文各不同如莊公正終則曰公薨于路寢曰
葬我君莊公是薨必有其地葬必有其時也隱非正
終則曰壬申公薨而葬亦不書閔公亦然似乎得其
情矣然桓公弒也曰公薨于齊不有其地乎曰葬我
君桓公不成其葬乎可見書地書葬亦不足為定例
矣蓋春秋魯史也在魯國且然又何疑于列國之卒
葬耶魯國臣子固當諱國惡矣而列國之諱獨非其
臣子之真情乎况弒多出於嗣君權臣不以實赴故

列國不以弑告而魯亦據其所赴告者書曰卒此必然之理也然則史以卒書孔子於二百年後獨能得其真情而改舊史乎知此則知列國或有雖弑而書卒者皆舊史也如趙盾許止書曰弑者亦舊史也信以傳信疑以傳疑孔子何所加損於其間哉

弑逆大惡也春秋隨事立文誠有之矣無非紀其事之實以垂戒也若各隨各傳以觀其釋義果可一律齊乎蓋有公子公孫弑其君者不書公子公孫謂惡

其大惡自絕於先君故去其屬籍以示討賊之義如
衛州吁之類是也有稱公子公孫者謂人君寵任太
過以致其亂故錄其族屬以謹履霜之戒如鄭公子
歸生之類是也有名其為子者謂見天性之恩曾犬
豕不若矣如楚世子商臣之類是也有以國弑如莒
弑庶其晉殺厲公者見其君無道國人共欲弑之示
不敢肆然民上也他如趙盾在外而書弑謂欲以示
天下無逃惡之地也許止不嘗藥而書弑謂欲以長

天下親愛之心也諸如此類似乎得其義之精矣然皆以意見為之說也何也弑之時其人情事變各有不同故各因其赴告或畧或詳而書之耳矧既曰弑矣又何必于弑之中一一窮其原情以定其罪而又
有輕重於其間也雖然隱閔本弑而書薨豈特魯為然哉如楚子糜齊侯陽生鄭伯頑本皆被弑而不赴告故史皆因其赴告而書卒耳可見聖人無一字如損於其間也孰謂千載以下可各以意見出入人弑

逆之大惡哉蓋亦枉用其心矣古者諸侯卿大夫士
悉命于王朝有罪則請于王朝非諸侯所得專殺故
五禁有無專殺大夫之條也春秋之時列國咸專命
亦專殺之矣然春秋所書同一殺也有稱國以殺者
有稱人以殺者而稱人稱國又有書名不書名之別
傳謂稱國以殺者國君大夫與謀其事不請命天子
而擅殺之也義係於殺則止書其官如曹殺其大夫
宋人殺其大夫義係於人則兼書其名氏如楚殺其

大夫得臣陳殺其大夫洩冶是也然又有稱人以殺
不書其官而止書姓名如鄭人殺良霄者或曰書人
以殺殺有罪也不書名非其罪也殺有罪而又非其
罪是失有罪而誤及無罪也如此則不書官而止書
名者是殺有罪也彼殺有罪而大夫不名則是殺無
罪矣二說不合故或又以為大夫之下闕文或以為
不書名者衆也果以為衆則晉殺三郤陳殺二慶矣
何以書名以為闕文則史何闕文之多哉噫或稱國

也或稱人也官之與名或書或不書而又有書及者或因弑君而及大夫或因殺大夫而及公子或因殺大夫而及大夫者止書其名而去官其說不一皆不足以盡其義也是故善讀經者固不可畧其所有亦何必益其所無而深文以求之哉

經文所書歸取二字諸傳因文立義其說多端大抵內取外邑曰取外取內邑曰取而內自取內邑亦曰取也外歸內邑曰歸外以人之邑與人亦曰歸外自

入其邑亦曰歸也然其所取之義謂何蓋外歸內邑
始取而終反之彼其願償我也故曰歸齊人歸我濟
西田是也外以人之邑與人外之意也順其意而書
之亦曰歸晉人來言汝陽之田歸于齊是也外以邑
賂我而禁於賂也亦曰歸鄭伯使宛來歸防是也內
取外邑強以力奪之也故曰取取郟防取訾婁是也
外取內邑亦強以力而見奪則亦曰取齊人取謹及
闡是也外侵內邑而內取之宜曰歸矣而亦書曰取

謂強其所不欲償也取濟西取汶陽是也只此二字
如此牽合初看亦有理原其經文謂史法果如是焉
否乎況歸曰來歸取曰伐取種種不齊惡可各以已
意務使經義之必我從也

滕子來朝謂魯桓弑逆既不能討乃先鄰國而朝之
故聖人削其侯爵而降之為子辨者有曰滕朝桓罪
其身可也何為終春秋之世不復稱侯而以一人罰
及後世哉又曰本時王所黜也然使時王能黜諸侯

則春秋不必作矣果如其言豈獨滕乎薛本侯也至
莊始書伯何也杞初稱侯至莊稱伯僖時稱子文時
稱伯襄時復稱子又何也況杞之初本公爵耶殊不
知當時大國不過公侯之爵在小國不敢與之抗且
不敢與之等故咸自降損以朝會大國求免其侵伐
之辱耳况爵尊則貢獻之儀隆稍自貶損則儀物亦
減如子產爭成之意故其言曰昔者天子制貢輕重
以列鄭男服也而使從甸服之貢所以懼其不共也

滕薛杞之降得非自降以求其禮之殺耶若如胡氏
黨惡之說不惟聖人不敢貶謫當時諸侯而諸國又
將何詞以解之乎

或問聖人述而不作之言亦只是如此說若春秋一
字一義非聖人裁定安足以為萬世之經曰聖人信
而好古子何為不信聖人之言蓋易書詩禮皆經也
易自伏羲畫卦文周繫詞孔子不過贊之而已矣然
猶曰皆聖人之文也詩書禮樂從古以來不知該幾

千萬卷孔子刪書止存百篇刪詩止存三百篇定禮
止存三禮而已未嘗於古人詩書禮樂加減一字也
何獨於春秋而疑之蓋孔子之意只是刪繁就簡為
天下萬世存其經常不易之道故於易書詩禮只是
有減無增所以為萬世之經也知易書詩禮之所以
為經則知春秋矣又問古之史官其褒貶書法果有
所傳受乎曰古之天子國君各設有右史記言左史
記動一言一動必書之史策曾謂周公經國獨於史

官無書法耶且古人世為史官故世掌書法觀老聃
為柱下史晉董狐楚倚相俱是何等人品其于國家
政事反不能斟酌字義以書之何足以稱史乎特其
所書者頗繁孔子不過因魯史以刪削之耳然則何
為只據魯史筆削便能使亂臣賊子懼也曰聽子之
言終是為舊時見聞纏縛故不能於孔子誰毀誰譽
直道而行處見得端的未免有所疑也子知詩之風
乎知風之有二南乎一部國風中間多少出於當時

閭巷婦人女子之口然孔子亦只是刪其無關風教者却未嘗於婦人女子之詩增損一字如何能感發人之善心懲創人之逸志乎魯國史官曾婦人女子之不若乎信得孔子於各國之風雖出於婦人女子者不必增損一字自足以致人心之感創則於魯史書法未嘗增損一字而能使亂賊懼者不待辨矣

自隱元年至末二百四十餘年魯之史官秉筆以書者不下數十人縱使書法有傳而數十人中所見各

別則雖同一事例而所書者各徇其所見則其文亦不一也孔子生於三百年後以為我聖人也我即天也一一縱筆改之盡得其實是以司馬遷待孔子也且司馬遷從上古以來各徇其見聞意識以記之反在孔子上一等矣此等識見安足以明春秋

經本易而傳反難之何也事跡之參錯與經文間有異同將信經乎而傳則各有來歷將信傳乎而經文原未詳書此所以愈覺其難也經本明而傳反晦之

何也義理之精深於經文似有發明但欲合各家之傳以明之則人各一見既無所憑欲止據一傳之義以明之則字各一例彼又每每自有牴牾此所以祇見其晦也然則竊義于諸家各有所採何哉吾從其同而易者不敢肆力於其異且難也故事與經同雖欲不從不敢也苟事與經異吾知從經而已矣縱有不詳敢不遵夫子闕文之教乎吾從其簡而明者不敢勞心於其鑿且晦也故義不背經雖欲不從不敢

也苟有未當吾將以俟後之君子而已矣敢不遵夫子闕疑之教乎所以吾惟即其易明者畧述其事或直陳其義以請質於三代直道而行之人耳況易則易知簡則易從夫子之教也若云艱深難測則夫子何不止留各國之信史以垂世乃使後世徒費精神於謎語以遙忖聖人必不然之旨哉是故處千百年之下懸想千百年之上逞一人測度之臆見以穿鑿聖人筆削之真精則吾豈敢

或曰事文皆述古矣竊取之義何謂哉日記謂屬辭
比事春秋之教也事即桓文之事辭則史之文也明
矣是故屬其辭比其事而大義昭然何必深文敷事
以晦其義也

即如趙東山因日月以明類謂以日為詳者則以不
日為畧以月為詳者則以不月為畧其以日為恆者
以不日為變以不日為恆者則以日為變甚則以月
為異其以月為恆者以不月為變以不月為恆者則

以月為變甚則以日為異而日月之法又相經緯似
乎極精密矣但既曰凡桓文之盟不日雖公會不日
矣又曰凡晉主夏盟桓日而晉又非主夏盟者乎既
曰內離會不月外會公不月必參會後月矣又曰凡
魯桓之會皆月而桓之會豈皆參會者乎既曰內外
侵伐皆不月矣又曰凡魯桓會伐皆月果諸侯之惡
獨魯桓為甚乎且曰桓之盟不日信之也莊一十三
年十二月甲寅公會齊桓盟于扈何為而日之歟葵

丘之會盟既曰書日以別之矣而首止甯毋何為而不日之歟以此觀之常變詳畧莫非以已意為之如之何而可以為定例哉

或問趙東山春秋屬辭子謂其止得比事之例而非屬辭之義何也曰彼於各國諸侯大夫卒葬會盟侵伐稱國稱氏稱名各為一類事固可以比而觀也豈辭之相屬哉然則屬辭何謂也即每歲每時每月止書數事中間削去不知幾何如莊三十二年八月癸

亥公薨于路寢冬十月己未子般卒公子慶父如齊
閔二年秋八月辛丑公薨九月夫人姜氏孫于邾公
子慶父出奔莒文十八年春王二月丁丑公薨於臺
下秋公子遂叔孫得臣如齊冬十月子卒夫人姜氏
歸于齊季孫行父如齊宣元年春王正月公即位公
子遂如齊逆女三月遂以夫人婦姜至自齊夏季孫
行父如齊公會齊侯於平州公子遂如齊六月齊人
取濟西田即其文辭聯屬其真情大義何至簡而至

明乎又如叙齊桓之霸僖三年秋齊侯宋公江人黃人會于陽穀冬公子友如齊涖盟楚人伐鄭四年春王正月公會齊侯宋公陳侯衛侯鄭伯許男曹伯侵蔡蔡潰遂伐楚次于陘夏楚屈完來盟于師盟于召陵齊人執陳轅濤塗秋及江人黃人伐陳冬十有二月公孫茲帥師會齊人宋人衛人鄭人許人曹人侵陳五年夏公及齊侯宋公陳侯衛侯鄭伯許男曹伯會王世子于首止秋八月諸侯盟于首止鄭伯逃歸

不盟其中或間一事者有之而聯屬上下詞觀之其
大義何待傳註後明也此所謂屬辭之義也以此求
諸二百四十二年孔子竊取之義可默識矣

春秋王正月圖

據胡傳此春乃夏正之春也在周正本為冬孔子欲行夏時故冠以夏正之春

據胡傳此正月乃周正之正月也在夏正本為十一月周以建子為歲首故以十一月為正月

春
王
正
月

據陽明先生周本改時故謂冬為春

據陽明先生周本改月故十一月即正月

夫以胡傳為是也孔子雖得遂其行夏時之志而實已冒夫生今反古之愆以陽明先生之說為是也孔子雖得追乎擅改正朔之非而亂臣賊子知所懼然武王周公何有於欽若昊天敬授人時之道恐二說俱未當也何也時未改月未改以子為歲首者止以新時周之命而使臣民之朝賀則以十一月為歲首耳其所以順天道授民時商周與夏一也孔子修春秋其事則齊桓晉文其文則史據事直書一仍其舊

特揭春王正月以大一統正所謂竊取之義也是故
時令統於天書春所以奉天時也則凡奉天時違天
時者俱不待辨矣紀法統於王書王所以尊王章也
則凡遵王法倍王法者俱不待辨矣柰何於孔子簡
易明白之書反以義理穿鑿之也况易曰兌正秋也
書曰惟十有三年春會于孟津詩曰維暮之春亦又
何求如何新畚於皇來牟將受厥明周禮中春令會
男女論語莫春浴乎沂其時未改可證也易臨卦

至于八月有凶書惟一月壬辰旁死魄詩四月惟夏
六月徂暑周禮正月之吉始和禮記王制二月東巡
狩五月南巡狩之類其月之未改可證也何為不證
諸五經而止執雜記正月日至與諸漢儒之說不以
悖天時誣武周即以變王法誣孔子也且前乎周為
商之建丑矣伊訓惟元祀十有二月朔不可以證商
之改歲未改月乎後乎周為秦之建亥矣月令十二月數
將幾終歲且更始不可以證秦之改歲未改時與月

乎至於諸儒又每以前漢厯律志為據嘗讀漢史文
帝二月詔曰方春時和草木羣生之物皆有以自樂
又二年春正月詔開耤田上親耕以率天下之民夫
漢初承秦至武帝始改正朔苟以耤田耕于正月之
春草木生於二月之和二詔為可信也則又何待武
帝之改賈誼之請乎如此之類畧舉其一二已耳諸
儒何為不究其義且不考其詳也故孟子曰盡信書
不如無書

元年春王正月

天有定時王有定法天時順則萬物理王法章則萬國寧此古今之大義也雖世代沿革不齊一治一亂而得此則治失此則亂又皆歷歷不爽毫髮孔子修春秋乃曰其義則丘竊取之而其義維何要惟奉天時尊王法也觀其首揭元年春王正月六字書法可知矣彼大哉乾元在天為春在人為王稱君為元首元后正此意也惟天子即位始得改元以統一萬邦春

秋所書元年者魯隱之元年也周天命未改魯可得而改其元乎故書元年即書春書王書正月而魯之改元其是非褒貶一展卷可具見矣况春秋天子之事也其必書春者所以奉天時也使天下曉然知天時不可悖則其中所書或順天時或悖天時者不待辨而自明如夏城郎夏城中丘八月壬午大閱冬十有二月隕霜不殺草李梅實之類其不時為何如也必書王者所以尊王也使天下曉然知天王不可違

則其中所書或遵王法或悖王法者不待辨而自明
如初稅畝作丘甲作三軍新作雉門及兩觀與夫大
雩大蒐丹楹刻桷之類其不法為何如也况書元年
於春王之上可見元惟王者之所自出書正月于春
王之下可見正朔非諸侯之所得專以元與正朔而
不遵乎天王則其餘禮樂征伐之專擅者可知以秉
禮之魯國而且改元則其餘諸侯之僭亂又可知矣
此聖人筆削之義非徒不以予奪之柄予魯而魯之

是也非也亦自不可逃也若曰孔子志欲行夏時故以夏時冠周月是本欲正天時尊王法以誅亂賊而先自犯之矣所謂知我罪我果在是哉夫衆言淆亂必折衷於聖經而易書詩禮其所載時月不一而足也且周特改歲未改時與月又皆班班可考也柰何後之人徒信漢儒而其釋經如易之八月有凶書之惟一月壬辰詩之七月周禮正月之吉始和皆傳會舛謬豈特春王正月為然哉但釋經本以明天時也

聖人筆削之大義炳然于卷首先已晦之矣則其中
書法原簡易明白反為諸傳所晦貿貿千百餘載可
勝慨也故于易書詩禮凡時月之可考者敢并錄之
以請證于尊經之君子云

易證未改時月

漢之興也適際書焚儒坑之後其文獻不足徵也已
然易獨以卜筮存而文王孔子乃後儒之著龜欲考
周之時與月幸有周易在也按四時十二月二十四

氣七十二候見于周公時訓其說則本諸夏小正者
夏后氏之書孔子得之杞者也夏建寅故其書始於
寅周建子雖改歲於十一月而授民時巡狩烝享皆
與夏時同故其書始于立春是說也不特有證于周
公七月之詩而孔子贊易其有取於時訓亦可證也
說卦傳云坎北方之卦也震東方之卦也離南方之
卦也兌正秋也於三卦言方則知坎震離兌各主一
方矣於兌言正秋者秋分也兌言秋分則震春分離

夏至坎冬至為四正矣復大象曰先王以至日閉關
所謂至日冬至也則復為冬至始為夏至而十二月
消息之卦可知矣豈惟孔子為然哉文王三分天下
有二以服事殷其不改殷之正朔無疑也易卦辭作
于殷末故繫辭謂易之興其當殷之末世乎然于臨
卦辭曰至于八月有凶夫臨觀二卦本相反也十二
月建丑為臨卦象二陽在下八月建酉為觀卦象二
陽在上則是建丑為臨建酉為觀本一定不可移

三

如此為臨☵如此為觀其序不可紊即使殷改十二月
為正月則八月乃夏正之七月矣于卦為否既不得
謂之觀抑謂之遯哉果信臨觀相反而八月有凶之
說于十二月建為酉于卦為觀則殷時月令亦猶夫
夏小正周時訓也三代未改時與月也彰彰著明矣
何獨于春秋之春王正月必謂周之改時改月孔子
揭夏時以冠春秋之首哉

書證未改時月

按周書泰誓首云惟十有三年春大會于孟津則孟
津興師乃春時事也武成篇首云惟一月壬辰旁死
魄越翼日癸巳王朝步自周于征伐商厥四月哉生
明王來自商丁未祀于周廟越三日庚戌柴望大告
武成既生魄庶邦冢君暨百工受命于周又戊午師
渡孟津癸亥陳師于商郊甲子昧爽受率其旅若林
會于牧野所記月日當亦不差書傳以旁死魄為一
月二日推之四月無丁未庚戌其誤認魄死姑置勿

論蓋每月望時明全生則魄全死所謂旁死魄者其
一月十七日乎如一月十七日為壬辰則戊午當在
二月十四日癸亥為二月十九日甲子為二十而丁
未庚戌在四月哉生明後既生魄前也以是并考之
春大會于孟津惟戊午王次于河朔牧誓時甲子昧
爽王朝至于商郊不在二月之中旬乎夫以二月中
旬謂之春而周末改時與月無疑也夫何證周之改
月者緣漢律厯志武王伐紂之歲周正月辛卯朔戊

午師渡孟津明日巳未冬至書傳本諸此然周書云春而漢志云冬至既以悖謬自今言之月朔魄死其果然乎後人踵漢儒之誤莫知折衷聖經多此類也然證之書也豈特周末改時與月已哉欽若昊天厯象日月星辰敬授人時萬古帝王之要道也如日中星鳥以殷仲春日永星火以正仲夏宵中星虛以殷仲秋日短星昴以正仲冬堯典未改可證也如正月上日受終于文祖二月東巡狩至于岱宗五月南巡狩

至于南嶽八月西巡狩至于西嶽十一月朔巡守至
于北嶽舜典未改可證也夏正建寅不必論巳殷正
建丑如伊訓惟元祀十有二月乙丑大甲中惟三祀
十有二月朔即此觀之舉元祀三祀而止云十有二
月固見殷以建丑為歲首而其未改時與月也不從
可證乎後人過信漢儒謂其改時改月者以殷之歲
首既在建丑之月即以建丑之月為春正月周之歲
首在建子之月即以建子之月為春正月均之以冬

為春一以大雪節為立春一以小寒節為立春也謂
改月不改時者以春夏秋冬之時令節候不可更置
惟歲首在丑則丑為正月歲首在子則子為正月但
殷則冬正月春二月三月四月周則冬正月二月春
三月四月五月有不同耳謂孔子必欲行夏之時故
于春秋以夏時冠周月者則以所書正月從乎周所
書之春從乎夏雖曰春正月實則冬正月凡月朔皆
魯史之舊文而時序乃孔子之微意是又改時不改

月之說也要皆求其說而不得故從而為之辭耳欲證周之時月盍亦求之書乎

詩證未改時月

詩三百篇除商頌外皆周詩也居周之時凡發之為風雅頌賦比興者即咏歌乎周之時臣民之分也邠風七月之詩周公作以訓誥成王而七月流火九月授衣傳謂七月為夏正七月也其果然歟蓋火流於七月衣授於九月萋秀於四月蜩鳴於五月霜肅於

九月場滌於十月稽諸天時人事以及物類之動植雖欲不謂為夏時焉不可也抑知周之時月其即夏之時月乎蓋周正建子為天統是特改乎歲焉耳其與夏商有不同者謂其改歲不同非謂改歲即改乎時與月也奈何自改時改月之說興後之人徒知信漢儒不知考證于三百篇之周詩也久矣至訓周詩而以夏訓之其亦未知雅頌諸篇所用時月皆七月之類乎小雅出車章有曰春日遲遲卉木萋萋鶴鷖

皆皆采繁祁祁周頌臣工章有曰維暮之春亦又何
求如何新畬於皇來牟將受厥明使周果改時則春
日暮春必夏之正月也正月安得有遲遲萋萋皆皆
祁祁之景而來牟安得有將熟之徵乎小雅六月章
有曰六月棲棲戎車既飭四牡騤騤載是常服十月
之交章有曰十月之交朔日辛卯日有食之亦孔之
醜使周果改月則六月乃夏之四月十月乃夏之八
月也四月既不可以興師而八月日食即為日月之

吉凶乎小明章曰二月初吉載離寒暑曰昔我往矣
日月方燠是日月方燠雖欲謂其非夏正建卯之二
月亦不可至于四月維夏六月徂暑秋日淒淒百卉
具腓冬日烈烈飄風發發其未改時與月也又不待
訓釋而自明矣况唐風曰蟋蟀在堂歲聿云莫七月
第五章曰五月斯螽動股六月莎雞振羽七月在野
八月在宇九月在戶十月蟋蟀入我牀下穹窒熏鼠
塞向瑾戶嗟我婦子曰為改歲入此室處即此細細

玩之時至十月遂為改歲之圖與歲聿云莫蟋蟀在堂
之咏無異也苟謂為夏正月也則其去改歲為尚遠何為
遽有入此室處之嗟乎然則周正改歲于十一月而不改
時與月也又不待取證雅頌而燦然悉見矣可知武王
改歲以新其命令而其欽若昊天敬授民時者如故
也縱使武周能改乎時與月也凡日月星辰之度昆
蟲草木之變武周必不能改也又何疑焉是故改時
月之說後儒之謬也後之人膠固其說讀周詩不推

類以考證于風雅頌之各篇也其繆妄又何如哉

禮證未改時月

周禮一書周家之憲章也孔子志在春秋而行事之實見諸春秋所以書天時書王章其書法一本之周禮豈徒有見於六官之首必稱惟王體國經野使萬邦曉然知天王之當尊而著為春王正月之書法哉即如冬夏致日春秋致月以辨四時之叙如中春晝擊土鼓歛芻詩以逆暑中秋夜迎寒亦如之如禁仲

冬斬陽木仲夏斬陰木如中春之月令會男女觀于
此則周之時信未改也不然冬至當在九月夏至當
在三月中春當在十二月矣周禮未改時而春秋所
書之春非即周禮之春乎如冢宰司徒司馬司寇皆
云正月之吉始和布治教政刑于邦國都鄙乃縣治
教刑政之法于象魏使萬民觀象挾日而斂之觀于
此則周之月信未改也不然則正月當在夏至建子
之月謂之始和不可也若以和布為義以始和布治

于邦國都鄙為句亦謂其和協而布之則和布與正月亦相需矣猶可以句義文釋之也天官冢宰篇凌人掌冰正歲十有二月令斬冰三其凌春始治鑑若周果改月則十二月為夏正十月矣安得有冰可斬也若周果改時則建子之月即為春矣又何待春始治鑑也况質諸郊風二之日鑿冰冲冲三之日納于凌陰時月皆昭合耶周禮未改時月而春秋所書正月非即周禮之正月乎他如魯論記于春秋時也曾

點言志云莫春者春服既成冠者五六人童子六七人浴乎沂風乎舞雩咏而歸使時果不同于夏正則暮春為正月矣斯時也沂果可浴舞雩果可風耶孟子作于戰國時也云歲十一月徒杠成十二月輿梁成使月果不同于夏正則為九月十月之時也農功未畢何暇于徒杠輿梁之舉耶至若月令作于秦呂不韋也季冬之月云日窮于次月窮于紀星回于天數將幾終歲且更始專而農民無有所使天子乃與

公卿大夫共飭國典論時令以待來歲之宜設使時
月非夏正則秦之歲始在十月矣斯時也日果窮于
次月果窮于紀乎可見孔子之春秋一遵乎周公之周禮
也而改時改月之繆不容掩矣或曰先輩謂周改時
月其所據者亦禮記也孟獻子曰正月至可以有事
事于上帝七月日至可以有事于祖七月而禘孟獻
子為之也斯言出于雜記宜亦可徵而可信矣曰明
堂位非禮記歟季夏六月以禘禮祀周公于太廟是

六月謂之季夏則七月非仲夏日至不待辨也況七月而禘乃云孟獻子之所為則獻子之言又安足信哉此所以觀會通然後可以行典禮即禮記一書雜記與明堂位安所折衷而孟獻子一言與六經孰得孰失也噫知周禮六官一統之以惟王知周禮布政必始之以正月而春王正月之書法孰謂周孔有二道哉

春秋二霸

齊桓公小正而不譎

晉文公重耳譎而不正

二霸譎正

孔子曰晉文公譎而不正齊桓公正而不譎此聖人
即春秋之旨以定二伯之優劣也昔者宣王中興伐
玁狁威荆蠻使之竄伏荒陲屏氣息不敢內顧自
平王東遷周道復衰時無宣王之盟無吉甫方叔之
佐是以荆蠻醜類浸爾跳梁入蔡伐鄭侵陳圍宋讎
狼狼戾所向披靡幸賴小白重耳相望而興或盟會
以聲其威或克伐以折其氣是以虐焰不逞中原少

寧則二伯之功亦云盛矣考之經筆其行事何終始相背馳也請備論之以伸孔子之說周惠王以惠后之愛欲廢太子鄭立王子帶而小白親率諸侯會世子于首止以定其位此正天下之功也至重耳敗楚未幾已致天王于踐土則與首止之盟異矣及惠王即世襄王以叔帶之難懼不得立使告於齊小白於是率諸侯以謀之此定王室之功也至重耳會溫未幾又盟王人于翟泉則與洮之盟又異矣小白以禮義

柔中國故盟會諸侯八然後有陞之師則先禮義而後
征伐者也重耳以兵革威中國故未嘗盟會諸侯遽
有城濮之戰則先征伐而後禮義者也小白之服楚
先侵蔡以示其威又次于陘以耀其衆及楚畏服遣
師乞盟於是結盟而還未嘗接刃則志在於全師而
已及重耳戰楚城濮則先侵曹伐衛及夫執曹伯畀
宋人以怒之然後合四國之師一戰屠楚兵革之威
疾若風雷則報楚之功與小白異矣小白盟楚之後

楚雖不敢憑陵大國而滅弦圍許滅黃伐徐連歲侵軼不少衰止至重耳既敗楚師不見經者七年雖徐許小國亦無楚患則服楚之功與小白又異矣小白之伯也諸侯未服固嘗侵伐之然不過伐其國之人臣使諸侯自懼而後已故莊十七年執鄭詹鄭伯遂同盟于幽僖四年執陳轅濤塗陳侯遂盟于首止此皆未嘗執諸侯也至重耳則執曹伯以畀宋人執衛侯以助元咺而曹衛兩國終不與其盟會則其所以

服諸侯者異矣小白之伯也伐戎者三救諸侯者四城國者三雖不能盡成其功然驅攘夷狄救卹災患其於諸侯亦不可謂無功也至重耳則戰楚之外不復有攘救之功故三十年狄侵齊而晉侯不能救三十一年衛還帝立而晉侯不城則其所以勤諸侯者又異矣夫二伯行事載在春秋其相戾如此竊嘗究其心矣方小白之伐楚非不欲戰也然當春秋時諸侯恣橫干戈相尋殘民暴骨不勝其患小白主伯方

崇禮義去侵伐以救當時之弊故端委正笏雍容乎
壇陛之間兵革不施而諸侯已諭其志又况當時楚
雖浸強其患尚小不過侵擾鄰境若蔡鄭諸國而已
及齊侯一出楚既畏服則召陵之師盟而不戰小白
之心也然而夷狄之性易以威制難以信結故自齊
伯而楚之驕暴甚於曩時至伐宋大國執天子上公
脇制諸侯使束身從已齊魯之君俯首帖耳委命下
吏無復慙色中國之風於是一變矣故重耳之興尚

懷仁厚不奮兵威則何以折楚而懲艾諸侯哉然則
晉之伯又不得不用征伐也雖然小白之會止致世
子重耳之盟乃名天王其罪之輕重與其心之謫正
固不待較而明矣雖然循流究源則小白之罪又加
于重耳何則春秋之作為尊王也當周之衰諸侯跋
扈忽傲天子君臣之禮掃地殆盡所賴於振興者二
伯而已使小白主伯之後即帥諸侯朝天子以令天
下則重耳雖不臣安敢致天王哉惟小白不朝京師

致王世子是以晉文得侈其惡無所嚴憚論春秋之義則小白之罪誠過於重耳矣嗚呼賢如二伯且假尊周之名而忘其實況當世諸侯哉孟子謂三王之罪人諒矣

春秋疑義

孟子曰詩亡然後春秋作其事則齊桓晉文其文則史孔子曰其義則丘竊取之矣所謂義者如一字之褒一字之貶皆由聖人之直筆故亂臣賊子懼也嘗

引伸觸類觀之多有所未諭者果可執一論之哉如
善惡必以實書而後知勸懲義也宋襄公執滕子而
誣之以罪楚靈王弑邾敖而赴之以疾亡是春秋皆
承告而書曾無筆削以垂勸戒其義果安在也左氏
論春秋之義有云或求名而不得或欲蓋而名彰其
果然歟即此而引伸之趙鞅以無辭伐國貶號為人
杞伯以夷禮來朝降爵稱子虞班晉上惡貪賄而先
書楚長晉盟譏無信而後列此論人倫臧否直道而

行是也奚為齊鄭楚國有弑君各以疾赴皆書卒

昭九

年公子圍弑其君郊教襄七年鄭子駟弑其君僖十

一年齊人弑其君悼公而春秋但書楚子卒鄭伯髡

頑卒齊侯

陽生卒 嫉惡之義果若是歟齊荼野幕之弑事起

陽生楚靈乾谿之阨禍由常壽而春秋皆損其首惡

捨其親弑反歸罪於乞比

齊陳亡楚
公子比

如是則邾之闇

者私憾射姑行欺激怒奚為不書弑歟春秋固多為

賢者諱也狄實滅衛因威耻而不書河陽召王成文

美而稱狩書法如是固以存中國尊天王而亂賊知

懼又何在歟哀八年及十三年公子再與吳盟皆不
書桓一年公及戎盟戎實豺狼非我族類非所諱而
諱之何歟諸國臣子非卿不書必以地來奔則雖賤
亦志如陽虎盜入于謹據陽闕而外叛傳具其事經
獨無聞何歟諸侯世嫡嗣業居喪既未成君不避所
諱此春秋法也何為般野之沒皆以名而惡祝之殂
直曰子卒而所書有不同歟君謂之弑卿士以上通
謂之殺此春秋義也桓二年宋督弑其君與夷及其

大夫孔父僖十年晉里克弑其君卓及其大夫荀息
夫臣當書殺而稱及與君弑同科何歟定六年書鄭
滅許以許男斯歸而哀元年書許男與楚圍蔡夫許
男既滅矣而重列諸侯舉兵圍國又何歟蓋春秋記
他國必憑來赴之辭而來者所言多非其實或兵敗
而不以敗告或君弑而不以弑稱或秋葬而春赴或
春崩而夏聞而史官之所記者已不能盡錄其實矣
況古者國有史官各具列其事觀汲冢所記皆與魯

同如殺其大夫執我行人鄭棄其師隕石于宋其三
事並出竹書紀年惟鄭棄其師出瑣語晉春秋是語
多古史全文故曰其文則史孔子修春秋不過仍史
文之舊也加以史策有缺文時月有失次如此之類
孔子其敢以己意增損于其間哉孔子不敢以己意
增損其間則讀春秋者亦不當以己意揣摩而文飾
之惡可執一以論之哉

齊人歸田

春秋時國莫強于齊晉列國不服則興兵構怨以侵其地服則相為好會盟誓以其地歸之而示之以恩無非攝服其心使其常聽命於我也定公十年春秋書曰公會齊侯于夾谷繼以齊人來歸鄆謹龜陰田左氏謂齊犁彌使萊人以兵劫魯侯孔子相魯公使士兵之齊侯將享公孔子辭故齊服義來歸田公羊則曰孔子行乎季孫三月不違齊人來歸田穀梁則曰兩君相揖齊人鼓譟欲執魯君孔子止之故齊歸

田至司馬遷作史記乃曰齊請奏四方之樂旌旄羽
被矛戟劍撥鼓譟而至孔子以為夷狄之樂何為至
此景公麾去之齊有司又請奏宮中之樂優倡侏儒
為戲而前孔子使有司誅之景公歸而恐乃歸魯之
所侵鄆汶陽龜陰之田以謝過後揚雄用其說曰齊
人章章歸其侵疆胡氏則謂夫子以禮責齊而齊人
歸地書曰來序績也自今觀之曰左氏則云犁彌言
孔丘知禮而無勇若使萊人以兵劫魯侯必得志按

春秋中國之會不知其幾未嘗有以兵劫人景公圍
姜伯魯方請成若以兵劫何以示諸侯乎借使有之
左氏以為萊人穀梁不言萊人但曰齊人公羊又都
無此說但曰孔子行乎季孫司馬又不言劫公之事
但曰奏夷狄之樂優倡侏儒為戲數者之說更相背
戾將誰信乎且左氏謂齊人加于載書曰齊兵出竟
不以甲車三百乘從我者如此盟孔子使茲無還對
曰而不反我汶陽之田吾以共命者亦如之故司馬

遷亦謂歸我汶陽龜陰之田據汶陽田與此所歸之
田自別稽之地志鄆田屬廩丘縣經書公居于鄆是
也謹在濟北蛇丘縣經書公會齊侯于濟是也龜陰
古梁父縣詩奄有龜蒙是也此皆魯地乃若汶陽則
齊田也成公藉晉之力取齊汶陽田未幾齊睦於晉晉
侯復使韓穿來言汶陽之田歸之於齊自此歸齊之
後魯不可得也而鄆田之失自昭公失國齊取此以
居之昭二十五年書齊侯取鄆是矣六年又書季孫

斯帥師圍郟即此年齊伐我西鄙之時失之則不得
以此田為汶陽之田明矣左氏何得以孔子請歸者為
汶陽而司馬遷亦謂汶陽田歸我耶杜預注曰三邑
皆汶陽田夫汶雖濟陽之道在魯西址境實汶上之
陽盡屬齊也閔子騫曰如有復我者則吾必在汶上
矣言欲北踰齊也齊人刺襄公曰汶水湯湯以此見
適齊何疑若三邑果皆汶陽則經又何不直書曰齊
人來歸汶陽田也是故胡氏襲諸說亦以來歸者齊

人心服而歸之而謂夫子自序其績不知春秋之作
正以明賞罰僭亂也方三家僭亂之極陪臣執國命
近有寶玉大弓之盜遠有叔仲圍郈之變聖人果得
大用於魯暮月而可三年有成曾不能一振魯之頹
綱乃區區自書其績以示後世乎說者意夫子嘗為大
夫於魯必有其功孰知夫子雖暫為大夫遭定公辱
懦三家專肆未幾齊歸女樂即致政而去矣歸田之
事於聖人何與哉嗟夫論古人當論其世春秋之世

何世也諸侯力爭喜怒無常與之隙則橫見侵奪與
之好則侵地復歸非獨齊魯為然故曰無非攝服其
心使其常聽命於我是也此年魯與齊有隙齊國伐
我者再公亦兩加兵于齊逮是及齊平為夾谷之好
會齊人謂魯服已故鄆謹龜陰之侵地復歸于我亦
如宣公之時齊人嘗取我濟西田及宣公事齊經則
書齊人歸我濟西田哀公之時齊嘗取我鄆及謹及
魯睦於齊經則書齊歸謹及闡若以此歸田之功出

自夫子則濟西之歸謹闡之歸為誰之力乎又以他處止書歸此書來歸雖夫子自書其績何嫌之有此又求之不得其說從而為之辭本以美聖人適以誣之矣噫夾谷之會雖魯與齊平孔子必具左右司馬以行所謂臨事而懼有備無患於此具見之也此則不可不知

孔子墮三都

定公十二年春秋書曰夏叔孫州讎帥師入郈季孫

斯仲孫何忌帥師墮費冬公圍成說者謂孔子為政于魯言於定公曰臣無藏甲大夫無百雉之城使仲由為季氏宰墮三都於是叔孫先墮郈季孫將墮費公山不狃以費叛將墮成公斂處父以成叛此蓋左氏倡之公羊附益之司馬遷遂從而記焉若果謂孔子用事三家信之如公羊之說則墮三都者乃三家之意也何用叔孫帥師而後墮費公又何為而自圍成乎三家必自帥師以墮私邑則非三家樂為之可

知既非三家樂為之則非夫子之謀行乎三家也又可知矣豈有聖人見任于定公見信于三家欲墮私邑雖公自圍之而猶有不能墮者乎觀是年築蛇淵囿非所宜築也大蒐于比蒲非所宜蒐也聖人不能諫而止之徒書之春秋以譏之耶又何惡三家之舞八佾歌雍徹不能救正之徒形之於慨嘆耶况十年經已再書叔孫州讎仲孫何忌率師圍郈矣比年之墮郈墮費圍成謀出夫子則前年之再圍郈又誰為

之謀而使之圍耶夫以三家之僭亂日久天子之禮樂征伐尚皆專為之彼其治兵積甲高城浚池以張大其私邑夫子雖仕於魯安能一旦遽使之墮名城出歲甲乎考之論語曰公山弗擾以費叛召子欲往弗擾即不狃也誠如諸儒之說則三都之墮一出於孔子然弗擾以費叛而召之欲往何前後自相背馳耶此無他諸儒以前年齊人歸田之功由於孔子故三都之墮亦必由孔子也且左氏曰費人襲魯公入

子季氏之宮登武子之臺費人攻之弗克入及側仲
尼命申句須樂頎下伐之費人灶又公斂處父同墮
成則曰我將不墮公圍成弗克夫好謀有成孔子平
日之言也今使費人得以自魯入及公側及公圍成
而終不能下乃欲以此歸美孔子可乎哉殊不知此
乃陪臣據私邑之始三家欲墮之而不能盡墮也借
使此舉實由孔子亦不過借三家之甲討陪臣之罪
因而復強公室而卒未之遂耳夫何功之有雖然夫

子曰禮樂征伐自諸侯出十世希不失自大夫出五世希不失又曰祿去公室五世矣政逮大夫四世矣故夫三桓之子孫微矣此正夫子作春秋之旨也惟諸侯僭天子則大夫必僭諸侯惟大夫僭諸侯則陪臣必僭大夫惟祿去公室政逮大夫之日久則陪臣出而乘之三桓子孫不得不微也當斯之世正陪臣執國命三桓子孫微弱之時也是以內則有陽虎蒧竇玉大弓外則有陪隸據私邑以叛侯犯臣叔孫者

也而以郈叛是郈非叔孫之所有矣公山不狃臣季氏者也而以費叛是費非季氏之所有矣公斂處父臣孟氏者也而以成叛是成非孟氏之所有矣由三家之僭竊已極當希不失之時而見侮於家陪耳故前年已再圍郈弗克今乃帥師圍郈以墮之者病其強而毀之也叔孫既墮郈公山不狃懼將及已而又叛故三子挾公以圍之耳噫三家繕兵積粟求以富私邑弱公家及私邑既強公家既弱而陪臣又為之患

亦若三家之禍魯也故春秋書之以為亂臣僭竊之
戒傳春秋者不得聖人垂訓之意反欲以此歸美聖
人則春秋又何以傳為哉

桓不書王

古者國必有史而史貴直筆謂凡事必據其實以直
書之則其善惡自見未聞敢以己見私賞罰而褒貶
之雖至于黜天王亦固有顧忌而為直者是故春秋
提綱揭領惟元年春王正月乃一書本義所關年必

次以春所以明天道也春必次以王所以明王法也
王必次之以正月所以明一統之正朔也惟天王正
朔之義明則一書之中凡其尊天時奉王章守一統
之正朔者不必同而同歸于聖人之所是凡其悖天
時逆王章自外於一統之正朔者不必同而同歸於
聖人之所非此春秋書法所以明白簡易不待考諸
列傳所紀載而是是非非昭然于聖經之筆削也信
乎春秋天子之事也然一書之中書王正月者九十

三王二月者二十一王三月者一十九無事首時亦冠
以王之一字而獨於桓公不書王穀梁以為桓無王
其曰王何也謹始也胡傳曰桓無王而元年書春王
正月以天道王法正桓公之罪也桓無王而二年書
春王正月以天道王法正宋督之罪也三年以後不
書王者見桓公無王與天王之失政而不王也是桓
公無王而歸罪於天子矣信斯言也孔子操筆削之權天
子失政亦可黜也已况春秋列國如桓公者不可勝

記而天子皆不能討則自平王以後王盡失政而無
一可書之王矣嗟乎縱使王無可書孔子以匹夫而
操乎黜天王之權方欲修春秋儆亂賊而躬犯黜天王
之罪如是而可以為春秋乎如是而可以為孔子乎
諸儒欲歸功孔子使孔子罪不可逭何其鄙悖至此
也且不書王者謂王失政也然四時不具不足以成
歲觀二百四十二年之間有日無月者十四有月無
時者二桓十七年五月無夏昭十年十二月無冬惟

桓四年并秋冬月日皆不書亦將以天道不時而黜之乎不然何為不書王者所以罪王而不書秋冬者非所以罪天乎所以定公元年無正月穀梁謂先君無正終則後君無正始是又因先君并黜後君也已此皆不通之甚也或者又以王不頒歷故不書王而秋冬月日之不書者亦將以歷之未頒故天時亦不備也耶僖公二十八年冬下無月而有壬申丁丑至於夏五郭公不惟公字差誤并五下月字亡之即此

可類推矣何也或史文先闕而孔子未之改或孔子
脩文而後又脫陋皆不可知故曰吾猶及史之闕文
也使一一穿鑿為之詞焉不惟春秋之義不明而以
擅黜天王誣孔子又執罪我春秋之語以證之其侮
聖賊經何可勝言哉

春秋總論

甚哉說經之難也非說之難能明聖人之意則難矣
非明聖人之意之難也能不牽于先儒之說則難矣

彼以為聖人之意有異於人乎哉是是非非善善而惡惡雖堯舜與塗人同而儒者之談經則曰此非聖人莫能修之自游夏所不能贊一詞者也於是乎平也而詭求之易也而艱尋之其尊聖人彌甚其說彌長而作者之志益以漓矣嗟乎獨抱遺經之嘆豈非千古之所同哉今以春秋疑義言之夫說春秋者類古所稱大儒也愚何敢以末議干之雖然六經將與天地無終極而存非一人一世之私論也敢效其

一得而試擇焉夫自秦人滅學六經缺如漢律既除
孔壁始出諸儒掇拾煨燼各名其家源遠而流益分
其間悖理亂真者固不少矣然易詩書之屬皆以理
勝理悖矣吾以理紕之其誣可立而辨也春秋以詞
勝事往矣吾從千載之下逾度之孰徵之而孰信之
乎是故說經者宜莫難於春秋也自漢而下說春秋
者亡慮數百家而獨公羊穀梁左氏最著胡氏最晚
出亦最著至我昭代胡氏得顯立于學官而諸家之說

幾盡廢矣夫左丘明與孔子共觀史記者也公羊穀梁皆受業子夏者也洙泗之淵源非遠筆削之微旨尚在然而口說流行事多失實如一盟也或以為蔑或以為昧一工築也而或以為鄙或以為微一會也而或以為屈銀或以為厥憇一卒也而或以為君氏或以為尹氏蓋自名氏土壤已替亂不能盡原况乃雌黃出其唇吻去取憑諸胃臆如馬端臨以意增損之疑者又焉能元覽精詣券合聖人之志乎至安國

之作傳也總三家紛紜之說而錄其似彙諸家後出
之論而采其長義例炳然袞鉞斯備可謂素王之忠
臣麟經之鼓吹矣雖然以為不詭於聖人之教則可
以為盡得聖人之意則未也夫經之為言常也聖人
之作經也簡易明白不以微曖難明之詞眩天下也
不以操切繳繞之文誤後世也要以是是非非善善
而惡惡以昭人道以達王事如斯而已矣迺胡氏一
時進御之言意存納約是故不免激焉而偏索聖人

之精義於一字筆削之文是故不免覈焉而深名其
可通者曰常例而強名其不可通者曰變例是故不
免窮焉而鑿如以春王正月為行夏之時是以周人
而改周朔於義則不順以夏時而紀魯事於史則不
倫非夫子之志也以王不稱天為貶夫事干宗國往
往諱稱其過舉而尊為共主則以小故削奪之非夫
子之志也以子滕侯為懲亂賊之黨夫躬為篡逆者
無誅焉而斥天子之命侯且并其子孫而奪之抑何

其慘礪而無謂也非夫子之志也以止不嘗藥而被
之以大惡之名是以微文而致重辟於人申商之所
不為也非夫子之志也卒楚麋也而曰扶中國信矣
其扶中國也曷不重貶子圍之會而姑諱其殺是登
叛也非夫子之志也書歸田也而曰以天自處夫其
詞無褒烏在其為序績也據事而直書之而必曰以天
自處是尊聖人之過而誣其實也非夫子之志也絕
筆于獲麟而曰以天道終是以瑞應神其書也且麟

之出經易故焉蓋所謂感麟而作者迹之而必曰文成而麟至非聖人之志也又有甚焉者以為夫子託二百四十二年南面之權以誅賞人也夫孔子雖聖周人也賤而自專突且及之苟無其位不作禮樂斯非孔子之炯戒乎夫子作春秋以尊周室而憫然攬夫天子之權以誅賞天下奪人之國貶人之爵去人之氏沒人之族操縱自我而無少顧忌焉則是干紀犯義已為戎首而顧以履忠效順責僭王之吳楚專魯

之三家也豈不蓋哉然則孟氏所謂天子之事者何
曰天子之事者猶云周天子之法耳當是時姬轍雖
東典刑猶在春秋而有所刺譏夫子曰非吾奪之也
是文武之法之所誅也春秋而有所褒進夫子曰非
吾予之也是文武之法之所賞也知我者文武之法
明謂我能尊周也罪我者僭亂之罪若則諸侯惡其
害已也此亂賊所為懼也第令夫子以匹夫自為天
子天下不軌之夫羣起而議其後之不暇而又誰能

懼之是故學春秋者明于天子之事之一言則孔氏
筆削之大義昭昭乎若揭日月而行而彼紛紛者之
說可不辨而息矣繇斯以談漢儒之說經也專門名
家抱殘守缺不相合而相存其失也固宋儒之說經
也師心背古揣摩傳會有所合而不必盡合也其失
也鑿彼固焉者信滯而不通矣然而非錯陳若蒼
素然不可淆而雜也鑿焉者雖辨而可喜矣然而憑
私臆決若射覆然不可倖而中也是故三傳立而聖

人之教分聖人之志則未失也胡氏之傳出而聖人之教尊其得者固多而失者亦不少矣愚竊考春秋之作實孔子口授弟子退而異言流傳失真其有無疑似之文蓋不特魯魚亥豕而已惟左丘明論本事而作傳於經文為近其餘百家之說未可定以為不利之訓也學者誠超然遠覽本之以經翼之以左氏折衷之以諸家之論要以會夫子存人道達王事之意而不牽于一曲之議此亦所以恢宏聖緒而俟萬

金定四川人三
卷十二
世于無窮矣若必強經以從已徇傳以蔑經即使左
氏投簡公穀操牘愚猶未敢盡信也況其它乎噫此
難與拘儒道也

書尹氏卒

經者常也萬世不易之常道也或經有難明賴傳以
發明者有之若因傳疑經使人信經不如信傳何以
傳為哉各經皆有傳雖其中識有不齊而理在人心
可各緣心之所明以折衷之無難焉春秋則據事明

義而事在古人匪後人可得而增減者四傳各發一
義未免揣摩測度於一字之間此以為是彼以為非
雖無疑者反因之以生疑縱自相牴牾亦弗之恤獨
左氏尤為後學所宗信焉得非以其文簡而事覈耶
然世之信傳而疑經不曰左氏一本乎古人之信史
事各有據則曰春秋止提其綱非左氏則事不可詳
不曰聖筆如化工非後人可得而擬議則曰經多微
其文隱其義惟傳或先經以始事後經以終義而傳

與經相並矣故信傳不信經豈特尹氏卒而已哉即
此一事言之左氏曰夏君氏卒稱子也不書姓為公
故曰君氏公羊曰尹氏者天子之大夫也其稱尹氏
何貶曷為貶譏世卿也穀梁大意與公羊同一以為
婦人一以為男子左氏則并經文而改之矣處千百
年之下斷千百世之上將何所據決其是與非也但
信左傳者莫不曰左氏即論語左丘明耻之丘亦耻
之其是非好惡本與孔子同且丘明親見魯史孔子

不過于魯史中舉其要而筆削之耳故傳文所書之
事無一字不可信者今惟以義決之君非姓也曾有
為君之母即可以君為氏乎若以為小君之君則有
經書小君者曷不書小君而以子改母之氏乎且夫
人書薨未有書卒者惟妣氏孟子書卒蓋妣氏哀公
妾母而卒之者定公薨哀未君也孟子乃昭公娶于
吳為同姓有別嫌之義故不敢以小君之禮薨之耳
隱公何為卒聲子哉或不稱氏如文四年夏逆婦姜

于齊宣元年遂以婦姜至自齊莊元年夫人孫于齊
僖元年夫人之喪至自齊雖不氏各有其義隱何為
欲明自家之攝位使母本有氏而反無氏至以君為
姓也若曰聲子本衆娣姪之倫不當書諸冊史官以
吾君之母不可不書又不可以夫人之禮書乃不得
已變其文法曰君曰卒舛謬甚矣况可以為孔子特
筆耶不知天子于臣或賜之姓而君氏之書果隱公以
子而錫母抑史官孔子以臣而賜君母之姓乎或問

公穀謂尹氏為周世卿曾有男可以氏稱歟曰小雅
節南山篇云尹氏大師為周之底秉國之鈞不平謂
何國既卒斬故家父作此詩以譏之胡文定引以為
証而有取於公穀之說也且尹氏卒于隱三年桓八
年天王使家父來聘安知此尹氏非即家父之所刺
者歟觀論語季氏舞于庭季氏旅於泰山孰謂男之
必不氏耶且不必遠證書尹氏卒下文書武氏子來
宣十年書齊崔氏出奔衛亦可以武氏崔氏為婦人

乎昭二十三年秋書尹氏立王子朝二十六年書尹氏以王子朝奔楚茲非尹氏不書名之証乎至謂尹氏卒是舉尹氏一族卒之矣然則舉武氏子一族而來之舉崔氏一族而奔之又舉尹氏一族而立王子朝乎矧即一尹字之可改則凡書中字義難明者傳皆得而改之矣或問尹氏不過天子世卿耳于春秋何所闕而卒則書之又何必書一世卿之卒而寓譏刺之意歟曰仕者世祿此王迹也以世祿者皆世爵

而世執政焉官不擇人世家專擅國政卽如前書尹氏卒後書尹氏立王子朝亦可以觀周政下移之漸矣雖尹氏專政非一世一人詩人于其生也詠以刺之而孔子不之刪史官于其卒也書以記之而孔子不之削凡此皆王迹世道之變而周室漸微悉于此乎寓之矣故孟子曰王者之迹熄而詩亡詩亡然後春秋作只此一端可推也讀詩與春秋豈徒瑣瑣于一譏刺褒貶間耶尹之於周也崔之於齊也正宜屬

辭比事而觀之矣噫左氏所傳者事也改尹作君且傳其所以書君氏之實果左丘明耻之之人乎抑親見魯史而實書其事乎即一可例其餘矣是故傳經者毋擅改經文以從己意為天下萬世存經常之道以俟後聖斯善談經矣

書納子糾

春秋之義莫大乎正名定分而名分莫大乎父子君臣是故立嫡以長不以賢立子以貴不以長此先王

立子之法萬世不易之禮也子路問桓公殺公子糾
召忽死之管仲不死孔子推管仲一匡九合之功已
有定論後學于糾白應立次第尚有疑義及讀春秋
各傳謂經書公伐齊納子糾齊人取子糾殺之乃云
所納應立雖未在位稱子蓋糾母魯女白母衛女則
糾貴為當立也後人不過以才論則小白賢以黨論
則小白以國高為內主以事論則子糾見殺而小白
成一匡天下之功殊不知糾貴之應立也果知糾白

正不正之分則春秋于糾稱子實與嗣君未踰年稱子同一例書納者納所當納也書殺者殺所不當殺也故公穀以桓為篡伊川謂桓公終不免罪在王法所當黜皆因書子之義以推明之耳例觀忽與突皆鄭莊子也二子爭立經書突歸于鄭鄭忽出奔若無異辭又書鄭世子忽復歸于鄭則世子當立何待他辭而後明乎申生奚齊卓子皆晉獻子也經書殺其世子申生又書里克弑其君之子奚齊何歟奚齊以

庶孽易嫡嗣未踰年見弑而曰君之子者明國人不
以為嗣獨獻公意欲立之耳是君獨以為子者蓋以
明世子無罪見殺而奚齊不過其君之子也雖云子
之其實外之以此發揮似乎義至精而至密矣執此
以明經文書子之義宜其無不協者然昭二十二年
夏書單子劉子以王猛居于皇秋劉子單子以王猛
入于王城冬十一月王子猛卒夫嗣君必踰年而後
稱王禮也猛立未幾稱之曰王王不稱名禮也復名

之曰猛既以尊居王位而卒乃稱子何哉蓋猛為次嫡兄終弟及實宜王也然未成君故不得不從夫未踰年稱子之例可見未踰年而稱王者權天下之大變君道也王稱名卒稱子者正天下之大綱子道也如此而發明子字意義猶可說也但猛與朝雖均為王之子也猛嫡朝庶宜不同稱既書王子猛又書尹氏立王子朝其意義將何以別之哉若曰王子朝非尹氏所當擅立者則書法又重在立字而子字非所重

矣是王子猛王子朝嫡庶可以同稱又無變例之可
解則子字之義至此亦說不去矣所以論春秋者不
可執一字為定論而孔子竊取之義豈若後儒拘泥
穿紐如法家串招之謂哉故舉書子一端可類推矣

季札來聘

後世評品古人賢否是非皆據其生平行實以定褒
貶而春秋則皆當時史官據事直書是非自見非若
後代紀錄前代者比也今以司馬溫公作通鑑朱子

作綱目合生乎素履以定書法者謂春秋亦若是焉
孔子竊取之義不愈晦耶即吳子使札來聘一事言
可知矣左氏謂其出聘通嗣君也公羊則云賢季子
也何賢乎季子讓國者也穀梁則云吳其稱子何也
善使延陵季子故進之也身賢賢也使賢亦賢也皆
予辭也胡氏獨謂札者吳之公子何以不稱公子貶
也辭國而生亂者札為之也故因其來聘而貶之示
法焉然既云因其來聘而貶之則貶在史官矣蓋來

聘在三十餘年之前辭國在三十餘年之後而史預
敗之有是理乎又謂仲尼于季子望之深責之備故
不讓國為賢而以因讓生亂致敗是據其終生行
實以為當年書法刻亦甚矣然則予之者當乎彼杜
預謂通嗣君通餘祭嗣也蓋二十五年過為巢牛所
弑餘祭始立至此始使札通上國然歟公穀之賢皆
謂仲尼因其能讓而賢之且以稱名為許夷狄以其
名成尊于上也但協于此塞于彼予皆莫達其所謂

義也已況三傳皆稱其賢雖胡氏亦謂責備賢者然則後人悉賢季子果安在哉嘗從而考之經書閣弒吳子使札來聘如此則札之來也孰使之也豈夷末新即位當先君未葬嗣君即命臣往聘鄰國而謂其使賢亦賢歟人臣于君死之月出使請觀周樂謂之身賢賢歟必不然矣有謂書弒與使中間書士鞅來聘杞子來盟二條均在五月之下可知札去後吳始告喪故追書閣弒於札聘之上耳是札以五月遣六

月至也此其使之者餘祭也札使在餘祭未死之前故至魯皆以吉禮行而歷觀周樂由其未聞喪耳果如此則傳稱通嗣君者非矣且傳謂季札遍觀周樂由此聘齊歷鄭適衛如晉宿戚聞鐘致譏刺孫文子是譏人聽樂而君尚在殯乃自請觀樂曾謂札之賢而宜有是事歟蓋札之讓國自古稱之美當壽夢時弟不可以先兄無可受之理也當夷未卒而辭及光殺僚以位讓而又辭非可受之時也謂札之讓國非賢

可乎特謂以此書札來聘而稱之貶之則舛矣或問
季不受國因光謂季子雖至不吾廢也知其讓非真
心後必有禍是矣獨不當伸大義以致辟于光乎又
不當選宗中賢者立之乃汲汲於延陵之去乎生亂之
貶宜不免矣曰觀札謂汝殺吾君吾受汝國則吾與
汝篡也汝殺吾君吾又殺汝則父子兄弟相殺無已
時也是亦度之審矣縱使札能殺光立賢而肯為此
耶或問胡氏謂其辭國生亂者不在餘祭王僚之

後蓋當壽夢時即宜法季歷以上承父命則吳之亂可早弭之矣是亂雖在昭二十七年致亂則在襄二十六年故析義極精非聖人莫之能修也曰王季當大王之沒也向使泰伯仲雍無荆蠻之逃在季只知以父命為尊而受其國歟且以此為仲尼責備賢者何獨于夷齊乃稱其求仁而得仁歟或又問胡氏謂貶札者以春秋多變例聖筆有特書荆楚無大夫而屈完書族王朝下士以人通而子突書字諸侯公子

以名著而季友書子母弟之無列者不登其姓名而
叔盼書氏皆賢而特書者也季札畧以名記比于楚
椒秦術之流非貶而何曰吳楚荆蠻之國秦介戎狄
之間故使皆不氏然則書楚子使椒來聘貶楚并貶
椒矣使遠罷來聘果罷賢于椒而褒楚並褒罷歟中國
皆書官矣如衛甯俞晉荀瑩韓起齊國佐宋向戌各
國之良也來聘皆書名不書官皆從夷狄之變例而
貶之歟如此則仲尼竊取之義何居曰吳楚皆變而

夷者也楚文稱荆成王稱楚既而稱人稱子與中國諸侯並以爵稱于吳亦然要在見吳楚日漸強盛與中國抗衡也春秋之始聘問不通既而來聘者大夫公子稱名見其漸與中國通也各書其實其義自見烏可盡以後人作史書法例觀之哉

楚子入陳

亂臣賊子天下大惡也討亂誅賊天下大義也大義不明則臣弑君子弑父人類變為禽獸而天理漸滅

盡矣憂世道者寧能忘情于扶植綱常之舉動哉是故陳恆弑君孔子沐浴請討正以亂賊人人得而誅之雖魯君臣不能倡大義以奉天誅逆然請討一舉聞者心寒至今如赤日當空迅雷奮地猶有生氣設能替此大義舉于當時有不痛快人心者哉即孔子春秋之修即其請討之意所以誅亂賊明大義也二百四十餘年亂臣賊子交臂接踵靡國不有雖齊桓晉文不能以此仗義執言惟楚莊伐陳執夏徵舒聲

其罪而戮之終春秋僅見此舉其視一匡天下九合諸侯者不其尤光烈哉柰何諸傳或以為楚子帥師而稱人者貶之也不與外討也或以為楚子伐陳而書入者不使夷狄為中國也雖實與而文不與也文定則云稱人者大惡人人之所得討也先書殺而後書入者討其賊為義取其國為貪一褒一貶義利判而予奪公乃聖人傳心要典也即一事之書法華袞鈇鉞並存亦嚴矣哉雖然儒者每每論義理析秋毫

似乎無容喙矣但似義非義毫釐千里不可不察蓋
即是年經文所書而會通以觀之乎春王正月夏楚
子陳侯鄭伯盟于辰陵公孫歸父會齊人伐莒秋晉
侯會狄于欒函冬十月楚人殺夏徵舒丁亥楚子入
陳納公孫寧儀行父于陳一歲間所書止此是先後
皆楚之盟會侵伐中間書魯與齊晉所會所伐屬其辭
而比其事孰得孰失不其昭然較著也哉何也當時
不幸無王猶幸有伯以其能誅亂討賊能攘夷而安

夏也齊晉襲伯主之餘烈魯國稱信義之是崇晉人所
會者狄也齊魯所伐者莒也以櫓函比之辰陵果孰
為要乎以伐莒較之伐陳果孰為重乎引伸觸類春
秋所書事文極簡而其大義實炳朗簡策中原不待
傳而後明也矧既謂之義則義孰有大於討亂賊者
諸家據左氏楚子為陳夏氏亂故伐陳謂陳人無動
將討于少西氏遂入陳殺夏徵舒是傳謂楚子本先
入而後殺也若先入後殺則楚子罪不可解矣聖人

乃以討賊為天下大義不可以楚故而不明故改書
先殺而後入惟與其討賊則罪從末減而經書入焉但
入亦不順之辭納公孫寧儀行父皆入陳時事所以
文定謂其假討賊以縣陳乃聖人誅心之筆法也文
法先後間心迹功罪並著謂其析義不精不可矣嗟
夫以今揣古安知非楚兵入殺在前楚子之入原在
後乎安知先殺後入之文本皆魯史之舊而經未之
改或左氏總書入為省文乎惟其不信經文反因傳

以疑經之先後緣文生解猜度聖心使誰毀誰譽直
道而行之公既不得大明於當時其文則史其義則
丘竊取又不得暴白於後代使人皆得以逞私智侮
聖經鯁鯁焉以洗垢索瘢為大義得毋有類於非義
之義乎或問聖人未嘗顛倒魯史要在觀其世道升
降扶植綱常是矣論迹誅心非聖人其誰能之曰五
伯降假之豈獨楚莊為然若以心言齊桓責楚晉文
信原豈真心哉說者謂楚莊果有討賊之心則當執

徵舒于辰陵之盟不必興兵以入陳俘歸生于四年之伐不必降鄭于肉袒此皆以王道律之也然而彼善於此以是年齊魯之會伐反在楚之下風而莊王殺夏徵舒亦何必求備以反掩其討亂賊之大義乎詩亡然後春秋作

六經之教其要在於淑世道正人心也人心正世道淑此詩與春秋所以後先之一揆乎彼春秋有關於人心世道也人知其筆削予奪義例謹嚴其權一歸之

天王而欲考王者之迹悉於春秋乎見之天下無王而有王者無史而有史故曰春秋天子之事也至於春秋之所以作也孔子因詩亡王迹熄故不得已而竊取其義但王者之迹尚存十一於千百乃所以繼詩之亡而存詩之教焉微孟氏其誰知之然則詩之亡也果黍離降為國風而雅於是乎亡歟風雅皆詩也雅亡而風存曷為而謂之詩亡也不知風雅頌皆王者迹也王迹熄則詩雖存而實亡矣何也古者

天王巡狩列國使太師采民風焉諸侯朝之方岳必
陳詩而觀之以行黜陟之典迨周室東遷則天王不
巡狩諸侯不會朝矣又何有於詩之陳而采也夫巡
狩朝會之迹熄矣王迹熄而詩亡也非歟况闕雎葛
覃王者閨門之化也繼世雖無文王后妃之德而是
詩樂作於房中則王者正家之迹尚于此乎存故師
摯之始闕雎之亂洋洋乎盈耳哉想自太師摯適齊
而闕雎之樂無聞矣雍詩王者祀宗廟之樂歌也繼

世雖無天子穆穆之德而周之祖廟主祭者天子也
助祭者辟公也聞其歌樂尚可以想見先王之迹及
三家以雍徹而大夫僭用天王禮樂謂王迹尚存於
祖廟可乎哉湛露彤弓故武子曰昔諸侯朝正于王
王宴樂之于是賦湛露則天子當陽諸侯用命也諸
侯敵王所愾而獻其功王于是乎賜之彤弓一彤矢
百旅弓矢千以覺報宴今陪臣繼舊好君辱貺之其
敢干大典以自取戾觀武子之言王迹存乎否也由

此推之他如鹿鳴王者乞言之迹也四牡勞使臣也
皇華遣使臣也采薇遣戍役也出車勞還卒也杖杜
勞還役也魚麗嘉魚南山王者燕享所通用也蓼蕭
桑扈魚藻王者燕諸侯也天子不乞言則鹿鳴不形
之歌樂而王迹不既熄乎乞言之迹熄鹿鳴雖存而
實亡矣即鹿鳴雅頌皆可類知不然三百篇至今存
也謂之詩亡何哉孔子懼王迹熄也因詩亡而作春
秋正以存王迹耳是故其事齊桓晉文其文則史其

義則立竊取之揭春王正月冠諸首而據事直書筆
其有關於人心世道者削其無關於人心世道者自
周王世卿以及列國諸侯大夫凡奉周正朔而禮樂
征伐一遵乎王者之成憲則不待孔子褒之天下莫
不以為是凡悖周正朔而禮樂征伐或違乎王者之
憲章則不待孔子貶之天下莫不以為非是非非
燦如日星王政雖不大行於天下而猶存於春秋之
筆削此所以亂臣賊子懼也猶之乎告朔之禮不行

於魯廟而餼羊存焉尚可以循迹而求其實也已噫
嘻知孔子愛禮存餼羊之心則作春秋存王迹之意
知我罪我蓋深有不得已者在矣雖然懼亂賊即所
以存王迹也即所以淑世道正人心也周道陵夷使
天下尚知周王之當尊者固由於桓文之霸使桓文
之徒尚知王者之大義不敢踰越凜然有所畏忌者
孰非作春秋之功哉但王政不得大行于華夷而其
迹僅存于春秋猶愈于詩亡而并亡其迹乎然則詩

雖亡而未亡者以有春秋在也信乎詩也春秋也其
教一而已矣要之王迹存則治熄則亂孔子刪詩作
春秋不特存王迹于當時而萬世之下咸得以見先
王之迹者皆其澤也遐想三百篇未刪之前其雜亂
當何如也二百四十二年之行事未筆削之前其繁
蕪當何如也雅頌各得其所孔子特刪其無關於王
迹者耳予奪一循乎史文孔子特削其無關於王迹
者耳惟其一經聖人手筆遂為不刊之典柰何後之

儒者既曰孔子降黍離為國風又曰孔子以夏時冠
周月是居下悖上生今反古而反以悖亂王章加孔
子也於心安乎哉今詩與春秋具在也安得知尊王
之義者與之共論孔子之心

